

Labari kpa n bo YOHANE akerε i ni

Yesu ti Nɔanie n bo i ma ηγωω n a

¹ Kana Nyεμε ba yi durunya ni, be woori bere bo bu fere i ka Nɔanie. I ni Nyεμε woori bere a. Yiri Nɔanie ni ti Nyεμε a.

² Fite i bumboori n kerε, yiri ni Nyεμε wo bere a.

³ Na Nyεμε ama Nɔanie n ayi deke n kerε. Deke be wo má bere bo wɔ yi má i.

⁴ Nγωω fite yiri Nɔanie ni dɔ a. Nyini ηγωω ni fa wein ba tekeeri adamande nyi a.

⁵ Na wein n aje awosin nu, na awosin n akoro akunma má wein ni.

⁶ Nyεμε yo sunmaari sɔnɔ be, bu fere i ka Yohane.

⁷ I baari ka i ba di nyini wein n daani wɔ, na i kan i jɔre kere minem, adena sɔnɔ kerε bo i tiiri kabo i kan ni, na bu daari nyini wein n ηu.

⁸ Yohane n mmɔɔ ni i tii yo ti má wein ni, ama, i baari ka i ba di wein n daani wɔ.

⁹ Nyini wein ni ti wein nahɔre su n a, bo wo ba durunya n nu, na i teke adamande kerε nyi.

¹⁰ Yiri n bo bu fere i ka Nɔanie n yo woori durunya n nu wɔ, Nyεμε faari yiri yiiri durunya n a, haari ni nyini n kerε mmɔɔ, durunya n nufɔm asi má i.

¹¹ Na wɔ ba i tienngu deε asien n su minem dɔ, na ba kete ka bu de má i.

12 Ama, na minem kere bo bu deer i, na bu daari i ɲu ni, na wo ma bu atin ka bu kaaki Nyeme nbaam.

13 Bu Nyeme nbaa kaakiiwam n ti má ka bu wu bu ni adamande mbunja a, nzen má nyini, i ti má ka bieso ni bara sanga a ye bu wu bu a, ama, Nyeme ni i tii, ti bu Si a.

14 Na yiri Noanie n akaaki adamande aba awo ya do. Ahoroma ni nahore wo i do beberebe. Ya ɲu i jirima woowa ni, nyini jirima woowa n ye Nyeme afa ama i Wa kun n kpein n a.

15 Yohane diiri i daani kereeri minem, na wo tien ase ka, “Nyini sono n bo m yo seeri am ka i wo m sin suba na i tara m fieo n lee, dama kana bu ba wuuri m ni, yiri wo bere wo.”

16 I ahoroma beberebe n dee ti, ye ya di i ahoroma, na ya toko di i buka su.

17 Nyeme yo faari i noanie kpamaawa ni maari Moyisi ka i fa kere Yisarelifom, ama, Yesu Kristo aba ka i ba kere ya kabo Nyeme ahoroma n ni i nahore n ti barasu wo.

18 Be nya ɲu má Nyeme, má ka i Wa kun n kpein n bo i ni i Si Nyeme n ti kun ni, na i wo Nyeme do ni, yiri ye wo kere ya kabo Nyeme ti a.

Yohane Nyeme Nzue Biefɔ n daani diiwa ni

19 Ahin ti daani diiwa n bo Yohane yo diiri i, sanga bo Yudafom nkpienkpienm n bo bu wo Yerusalem mie kpiri n nu n sunmaari Nyeme sayoowa donɲuyofom ni bu bukafom ka bu ko bisa Yohane ka, “Woro la ɲma a?”

20 Yohane afie má bu jɔɛ be su, na wɔ kan i kere kpain akere bu. I ɲa, “Má mini ti Kristo ni, Tiidefɔ n bo Nyeme ɲa i súnma i n a.”

21 Na ba bisa i bekun ka, “Ye wɔɔ la ɲma a? Wɔɔ ti Nyeme ɲɔanie kanfɔ Eliya n a?” Na wɔ se bu ka, “Má yiri la mini.” Na ba kaaki abisa i ka, “Wɔɔ ti Nyeme ɲɔanie kanfɔ n a?” I ɲa, “Ai.”

22 Na ba sa su abisa i ka, “Ye wɔɔ la ɲma a? Ma ya ɲɔanie na ya kɔ se bo bu sunmaari ya ni. Wɔɔ ɲa, wɔɔ la ɲma tenle su a?”

23 Na wɔ se bu ka, “Sɔnɔ n bo Nyeme ɲɔanie kanfɔ Esaya yo kereeri i jɔɛ ka i bá subo ndoori boro kpantain nu n ka,

‘Am yo Mibie n atin n dɔŋgu.’
Yiri la mini.”

24 Minem bo bu bisaari Yohane bisaawa ni, Farasifɔm bo bu ti Yudafɔm asese be ni sunmaari bu a.

25 Na ba kaaki abisa i ka, “A ɲa a ti má Kristo Tiidefɔ ni, a kaaki ti má Eliya, na a kaaki ti má Nyeme ɲɔanie kanfɔ n ni, ye nzu ti ye a bie minem Nyeme nzue a?”

26 Na wɔ bɔ bu nu ka, “Mini bie minem Nyeme nzue wɔ. Ama, sɔnɔ be wo am nu fen bo ambere si má i.

27 I wo m sin suba, m ti kaan ni bo m dodo i mmɔɔ.”

28 Ahin sa n kere yo yoori mie n bo bu fere i ka Betani n nu wɔ, i wo Yodan kunma n wie afiri, deke bo Yohane yo bieeri minem Nyeme nzue n wɔ.

Kabo Yohane ɲa Yesu ti Nyeme bɔmbaa ni

29 Alecin fɔfɔrɛ na Yohane aɲu ka Yesu suba i dɔ, na wɔ se ka, “Am niɛ, Nyɛmɛ bɔmbaa n bo wɔ ba ka i ba yi durunya n nufɔm satie n lɛɛ.

30 Yiri, ye m yo seeri am ka sɔnɔ n bo i wo m sin suba na i tara m fieo n lɛɛ, dama i yo woori bɛrɛ wɔ ka, ye bu wuuri m a, yiri lɛɛ.

31 Mini mmɔɔ ni m tii yo si má i, m dɛɛ la ka m biɛ minɛm Nyɛmɛ nzue wɔ, adena ambɛrɛ Yisarelifɔm si i.”

32 Na Yohane adi daani ase minɛm ka, “Ma ɲu ka Nyɛmɛ Awiewie Casi n afite aɲgoro ajura ka tiiwa dɛɛ su aba atana i ɲu, na wɔ wo i dɔ.

33 Mini mmɔɔ ni m tii yo si má i, ama, Nyɛmɛ bo i sunmaari m ka m ba biɛ mine Nyɛmɛ nzue ni, yiri seeri m ka, ‘A bá ɲu ka m Awiewie ni júra ba tana sɔnɔ be ɲu, na i wó i dɔ, yiri má m Awiewie Casi n ba wura minɛm ɲu a.’

34 Ma ɲu i sɔ ye m sudi daani kere mine a, ka yiri ti Nyɛmɛ Wa n nahɔrɛ su a.”

Minɛ n bo bu du mɔ yoori Yesu susufɔm ni

35 Na alecin fɔfɔrɛ bekun na Yohane ni i susufɔm ni nnyɔ jina.

36 Na wɔ niɛ aɲu ka Yesu wo natiiri su susin, na wɔ se ka, “Am niɛ, Nyɛmɛ Bɔmbaa n lɛɛ.”

37 I susufɔ nnyɔm n tiiri sɔ n na ba kɔ asu Yesu su.

38 Na Yesu akaaki anie aɲu ka bu susu i su, na wɔ bisa bu ka, “Am koro nzu wɔ?” Na ba bisa i ka, “*Rabi*, a da ni wɔ?” *Rabi* bu la ka, ya Kerefɔ.

39 Na wɔ se bu ka, “Am bra na am ba niɛ.” Nyini saɲga ni, naasɔ kerefi nna abo, na ba su i su, na ba kɔ aɲu deke bo i wo ni. Na ba ka i dɔ nyini cɛɛn ni.

⁴⁰ Nyini mine n nnyom n bo bu yo tiiri kabo Yohane seeri n na bu suuri Yesu su ni, bu nu kun ye bu fere i ka Andere n a, bo i goro la Simon Petoro ni.

⁴¹ Nyini sin na Andere ako anu i goro Simon, na wo se i ka, “Ya nu Mesaya ni.” Mesaya bu la ka Kristo, Tiidefo n bo Nyeme ase ka i sunma i ni.

⁴² Na wo fa i aba Yesu do. Na Yesu anie i nyunu, na wo se i ka, “Bu fere u ka Simon wo, woro ti Yohane wa n a, ama, bu ba fere u ka Kefasi.” I bu la ka yabue, i ni Petoro kere ti duma kun wo.

Kabo Yesu fereeri Filipu ni Natanieli ka bu su i su ni

⁴³ Alecin fofore na Yesu ayasu ka i ko Galili dee awore n nu. Na wo ko anu sono be bo bu fere i ka Filipu ni, na wo se i ka, “Ba su m su.”

⁴⁴ Filipu bosu la mie be bo bu fere i ka Besayida n wo. I ni Andere ni Petoro kere fite mie kun su wo.

⁴⁵ Na Filipu gusu ako anu sono be bo bu fere i ka Natanieli, na wo se i ka, “Ya nu sono n bo Moyisi yo kereri i jore Nyeme noanie kpamaawa kadasi n nu ni, na Nyeme noanie kanfom gusu yo kereri i jore bu dee kadasi n nu ni. Yiri la Yesu n bo i fite Nazareti ni, na i si la sono be bo bu fere i ka Yosefu ni.”

⁴⁶ Na Natanieli abisa i ka, “Deke kpa koro fite Nazareti dee mie n gusu nu?” Na Filipu ase i ka, “Bra na a ba nie.”

⁴⁷ Nyini sangha na Yesu anu ka Natanieli suba i do, na wo se ka, “Ahin sono n ti Yisarelifo baa a nahore su, bo sa be wo ma i nu.”

⁴⁸ Na Natanieli abisa i ka, “A yo se siiri m a?” Na Yesu abo i nu ka, “M njuuri u sanja bo a toko tana damba baka n bu n wo, nyini sin ye Filipu fereeri u n a.”

⁴⁹ Na Natanieli ase i ka, “Ya Kerefɔ, wɔrɔ ti Nyeme Wa n a, nahɔre su. Wɔrɔ ti Yisarelifom Feme n a.”

⁵⁰ Na Yesu ase i ka, “Bo ma se u ka m njuuri u damba baka n bu n ti ye a yo m yarada, nzen se? A bá nju alekutura sam bo bu tara so.

⁵¹ Nahɔre ye m suse am a. Am bá nju kabo angoro bá teke na Nyeme merékem bá sufun ko angoro, na bu bá sujura ba mini Adamande Wa n do.”

2

Kabo Yesu kɔri konyaya be Kana mie kpiri n nu ni

¹ Nyini sin, i lesan cɛen na konyaya be awo Kana, mie kpiri n bo i wo Galili awɔre n nu ni. Na Yesu ni gusu ako konyaya n nu.

² Na ba fere Yesu ni i susufom n ka bu gusu ba di konyaya n be.

³ Sanja bo konyayafom nzan n ba kpiseri bu su ni, na Yesu ni aba ase i ka, “Bu nzan n awie.”

⁴ Na Yesu abo i nu ka, “M ni, ye a nja m yo se wo? M sanja nya ju má.”

⁵ Na i ni ase awurunbaam n ka, “Am yo deke kere bo i se am.”

⁶ Nyini dika n nu, yabue cungu nsen jina bere, bo i kun kun kere koro de nzue ganja nnu wara nsen. Yudafom la bu yoowa be, bu fa nyini cungum n nu nzue ni, ye bu bita nmisi bu fin a.

⁷ Na Yesu ase awurunbaam n ka, “Am sa nzue go cunġum n nu na bu yi.” Na ba go i kere nzue na ba yi.

⁸ Na Yesu akaaki ase bu ka, “Kisa am sa be ko ma konyafan danfo ni.” Na ba sa be ako ama i.

⁹ Bu sa ko maari i ni, na nzue n akaaki nzan. Na wo fa akan i noo. Wo si ma deke bo nyini nzan n fite. Ama, awurunbaam bo bu saari nzue ni, bere si deke bo i fite. Na wo fere konyafan ni,

¹⁰ ase i ka, “Sono kere nya na bu ma nzan, bu du mo fa nzan fiɛfiɛ n ma jama n a ka, na ba nya aba anu abo ni, na bu nya fa bo i yo ma fiɛ n ma bu, ama, woro, a fa bo i yo fiɛ n aka sin a.”

¹¹ Kabo Yesu maari nzue kaaki nzan ni, nyini tiiri i ciciri su dee alekutura sa. I yoori nyini sa n Kana, bo i wo Galili awore n nu n wo, na i kere kabo i la yiko n bo i fite Nyeme do, na i susufom n ayo i yarada.

¹² Nyini sin, na i ni i ni, ni i niemam, ni i susufom n ako mie kpiri n bo bu fere i ka Kapenam, na ba ko ayo lennyo do.

Kabo Yesu fonri watafom fiteeri Nyeme Sereebiri Awuru n nu ni

¹³ Wo ka kaan na Yudafom di bu ceenkpiri n bo bu fere i ka Butara ceenkpiri ni. Na Yesu ako Yerusalem mie kpiri n nu.

¹⁴ Na wo ko awura Nyeme Sereebiri Awuru n nu anu ka mine wo do suto naanim, ni nboem, ni bumbuku tiwam, na nwaa kaakifom gusu tana do.

¹⁵ Na wo fa nyama anu i ka ngbere dee su, na wo fa afon ayi nboem n ni naanim n kere afite Nyeme Sereebiri Awuru n nu. Na wo sandi nwaa

kaakifom njwaa n kere abutu, na wo nya akaaki bu teebirim kere alanlanga.

¹⁶ Na wo se minem bo bu to bumbuku tiiwam n ka, “Am fa am bumbukum n fite fen. Ma am se ka am fa m Si Nyeme Sereebiri Awuru n yo go kun.”

¹⁷ Na i susufom n aba atenge su ka ba kere i Nyeme Jore Kadasi n nu ka, “M Nyeme Feme, m nyunu aboro u awuru n jore su, nyini kun m a.”

¹⁸ Na Yudafo nkpienm abisa i ka, “A yo nzu alekutura sa bo i kere ya ka a la atin bo a yo so a?”

¹⁹ Na Yesu ase bu ka, “Am bo fufu ahin Nyeme Sereebiri Awuru ni, na lesan afien m kaaki ta i bekun.”

²⁰ Na ba se i ka, “Afo aburana ni nsen ye bu fa taari ahin Nyeme Sereebiri Awuru n a. I yo se ye woro ba se ka a kaaki ta i lesan afien a?”

²¹ I yo kaanri so ni, i faari i nuniembaa ni fa sunsun Nyeme Sereebiri Awuru n a.

²² Na sangha bo i ba wu tengeeri i yiwee n nu ni, na i susufom n atenge su ka i yo seeri so, na ba de nɔaniɛ n bo ba kere i Nyeme Jore Kadasi n nu ni, na ba yo Yesu jɔjɔwa n yarada.

Yesu si kabo adamande woowa ti barasu

²³ Sangha bo i wo Yerusalem na bu sudi Butara cɛenkpiri ni, i yoori alekutura sam, na mine dongu anu i, na ba yo i yarada.

²⁴ Ama, yiri afa ma i nu ago ma bu nu, dama i si kabo adamande woowa ti.

²⁵ Ma pui ti, yiri mmoo ni i tii si kabo adamande ahore su ti barasu, ma be se i a.

3

*Kabo Yesu kaanri Nyeme jore kereeri
Nikodemo ni*

¹⁻² Cɛɛn be kɔŋgue sɔ ɔ, na Yudafɔm kpiɛn be aba Yesu dɔ, bu fere i ka Nikodemo. I ti Farasi-fɔm ni kun be wɔ. Na wɔ se Yesu ka, “Ya Kerefɔ, ya si ka a ti kerefɔ n bo a fite Nyeme dɔ ɔ, dama be koro yo má alekutura sa bo a yo bu ni, má ka Nyeme wo i mi dɔ.”

³ Na Yesu ase i ka, “Nahɔre ye m suse u a. Sɔnɔ koro fa má Nyeme yo má i femɛ, má ka ba wu i fɔfɔre.”

⁴ Na Nikodemo abisa i ka, “Sɔnɔ nyunu ati, bu yo se koro kaaki wu i fɔfɔre a? I koro kaaki wura i ni kunnu na bu wu i bekun?”

⁵ Na Yesu ase i ka, “Nahɔre ye m suse u a, sɔnɔ koro wura má Nyeme femɛya n nu, má ka ba wu i fɔfɔre fa kɔ nzue biɛɛwa ni Awiewie Casi n dɛɛ atin n su.

⁶ Deke bo adamande awu i, i ti adamande wɔ, na deke bo Awiewie Casi n awu i, i ti awiewie wɔ.

⁷ Má a ma i yo u alekutura fa kɔ kabo ma se u ka wɔ yo daka ka bu wu am fɔfɔre ni.

⁸ Sangá kere a ti ka aɲuma kpie kɔ ɔ, ye a ti i nanɲie ŋga a, ama, a si má deke bo i fite, na a kaaki si má deke bo i sukɔ, nyini ti, sɔnɔ kere bo Awiewie Casi n awu i ti sɔ ɔ.”

⁹ Na Nikodemo abisa Yesu ka, “I yo se ye ahin koro yo a?”

¹⁰ Na Yesu akaaki abisa i ka, “Wɔrɔ bo a kere Yisarelifɔm Nyeme nɔɔnie n na bu nyunu yi u ni, i yo se ye a si má ahin n a?”

11 Nahore ye m suse u a, sa bo ya si i, ye ya jɔjɔ i jɔre a, na sa bo ya nyumbaa anu i, ye ya di i daani kere minem a, ama, am akete ya daani diiwa ni.

12 M suse am sam bo bu wo durunya n nu fen wo lee, ama, am sude ma i, ye m ba seeri am sam bo bu wo Nyeme femeya n nu, am yo se de i a?

13 Be nya fun ma Nyeme do, ma ka mini Adamande Wa n bo m woori i do na ma jura aba ni.

14 Kabo Moyisi yo faari jawii yoori i ka woo dee su n na i fa i bara yeeri baka n na i yeeri i su kpamaari boro kpantain n nu ni, wo yo daka ka so ye minem ba ye mini Adamande Wa n su a.

15 Na sono kere bo i yoori m yarada, i nya ngoo bo i la ma awieeri ni.”

16 Nyeme akoro durunya n nufom agaya n dee ti, na wo fa i kunnu Wa kun n kpein n afa ama bu, adena sono kere bo i yo i yarada, i mi ka ma ngbeen, ama, i nya ngoo bo i la ma awieeri ni.

17 Nyeme asunma ma i Wa n durunya n nu ka i ba di bu jore cin bu sui wo, ama, wo sunma i ka i ba de bu tii ji wo.

18 Sono kere bo i daafiiri Nyeme Wa n nu, Nyeme di ma i mi n jore, ama, sono kere bo wo da ma i nu, Nyeme adu mo adi i jore ka, dama ka wo da ma Nyeme Wa kun n kpein n nu n dee ti.

19 Kabo Nyeme di bu jore n la ka, wein n aba durunya n nufom do, ama, bu satie yoowa n dee ti, ba koro awosin n atara wein ni.

20 Sono kere bo i yo satie kpo wein n wo, i koro ma ka i ko wein n nu, na i satiem fite fofoe nu.

21 Ama, sɔnɔ kere bo i su nahɔre atin su, i fite fofoe nu wɔ, na mine kere ɲu ka i sayoowa n su Nyeme atin n su wɔ.

Kabo Yohane diiri Yesu ɲu daani barasu ni

22 Nyini sin na Yesu ni i susufɔm n ako Yudiya dɛɛ awɔre n nu. Na ba kɔ adi lennyɔ dɔ, na i subie minem Nyeme nzue.

23 Nyini saɲga n na Yohane gusu subie minem Nyeme nzue. I wo Ayinon mie n nu fa dodo Salim awɔre n nu, dama nzue sunnu dɔ n dɛɛ ti. Na minem suba i dɔ na i subie bu Nyeme nzue.

24 Nyini saɲga ni, ba nya anyi má Yohane dansaraka.

25 Na Yohane susufɔm ni Yudafo be awura akuruwa fa kɔ bu fin kpara n dɛɛ yoowa atin su.

26 Na ba kɔ Yohane dɔ ako ase i ka, “Ya Kerefo, nie. Sɔnɔ n bo i yo baari u dɔ Yodan kunma n wie afiri n na a yo diiri i ɲu daani kereeri mine ni, yiri wo dɔ subie minem Nyeme nzue n a, bu kere sukɔ i dɔ ɔ.”

27 Na Yohane ase bu ka, “Sɔnɔ koro nya má deke be, má ka Nyeme afa nyini deke n ama i.

28 Amberɛ ni am tii woori m daani ka m ɲa má mini ti Kristo Tiidefo n a, ama, Nyeme sunmaari m ka m du i mɔ ɔ.

29 Bu nya jaari konya, i ti konyafan n dɛɛ wɔ, ama, na konyafan n danfo jina suso i sui ti deke bo konyafan ni jɔjɔ se i, nyini saɲga na i danfo n ahore jɔ. Nyini ahorejɔ kun ni, wo mini gusu dɔ a.

30 Wɔ yo daka ka i dɛɛ duma n fun, na m dɛɛ n kpie su.”

Yiri bo i fite angoro n deε jɔre

³¹ Yiri bo i fite angoro n tara sɔnɔ kere. Na bo i fite durunya n nu fen ti durunya n nu fen fɔ ɔ, na i jɔjɔwa kere ti durunya n nu fen jɔre wɔ. Ama, yiri n bo i fite angoro n tara sɔnɔ kere.

³² Deke bo wɔ ŋu i, ni bo wɔ ti i, ye i di i daani kere minε a, ama, be de má i daani diiwa ni.

³³ Ama, sɔnɔ kere bo i deeri i daani diiwa n asoro su akere ka Nyeme ti nahɔrefɔ lεε.

³⁴ Dama yiri n bo Nyeme asunma i ni, Nyeme nɔaniε n ye i kan i a, dama Nyeme afa i Awiewie Casi n ama i bo i la má anusu.

³⁵ Nyeme koro i Wa ni, na wɔ fa deke n kere awura i saa nu.

³⁶ Na sɔnɔ kere bo i daari Nyeme Wa n ŋu, i la ŋɔɔ bo i la má awieeri ni. Na sɔnɔ kere bo i kete i nɔaniε ni, i nyá má ŋɔɔ n bo i la má awieeri ni, ama, Nyeme fá yaa cin i sui.

4

Kabo Yesu seeri Samariyaɔ bara be i tii su jɔre ni

¹⁻² Tɔ. Na Farasifɔm n ati ka Yesu sunya minem dɔŋgu bo bu susu i su na i biε bu Nyeme nzue tara Yohane. Ama, má Yesu ni i tii biε bu Nyeme nzue n a, i susufɔm ni biε bu a. Sanga bo Yesu faari nu sɔ ni,

³ na wɔ yasu Yudiya awɔre n nu akaaki ka i kɔ Galili deε awɔre n nu bekun.

⁴ I sukɔ ni, wɔ yo daka ka i fa Samariya deε awɔre n nu sin a.

⁵ Na wɔ kɔ aju Samariya miɛ kpiri be bo bu fere i ka Suka n su, na i wo dodo asien n bo Jakɔbu yo fa maari i wa Yosefu dawa sanɔa ni.

⁶ Jakɔbu bura n wo nyini dika n nu wɔ. Natiiri fie n dɛɛ ti, na Yesu akɔ atana bura n su. Nyini sanɔa wiɛ abi kenken.

⁷ Na Samariya bara be aba ka i ba sa nzue, na Yesu ase i ka, “Ma m nzue n be na m nu.”

⁸ Nyini sanɔa ni, i susufɔm n akɔ miɛ kunnu ka bu kɔ to diire.

⁹ Na bara n ase i ka, “Ee, wɔrɔ, a ti Yudafo e, ye m gusu ti m Samariyafɔ bara. Nzu ti ye a se m ka m ma u nzue a?” Dama Yudafoɔm ni Samariyafɔm tɔ má pui.

¹⁰ Na Yesu ase i ka, “Nzen má a si Nyeme aceeri ni, na má a si sɔnɔ n bo i susere u nzue ni, má wɔrɔ sere i a, na i má u nzue bo i ma ɲɔɔ ni.”

¹¹ Na bara n ase i ka, “Ya si, bura n wo ɲɔ, u gusu la má goroka, ye a nya nyini nzue n bo i ma ɲɔɔ n ni wɔ?”

¹² Wɔrɔ, ɲka a ɲa a tara ya na Jakɔbu n wɔ, nzen sɛ? Yiri maari ya nyini bura n a. I ni i nbaam fa sanɔa ni i nengendɔrem kɛɛ yo nuuri nyini bura n nu wɔ.”

¹³ Na Yesu ase i ka, “Sɔnɔ kɛɛ bo i nu ahin nzue ni, nzuehɔɛ tí i mi bekun,

¹⁴ ama, sɔnɔ kɛɛ bo i nu nzue n bo m má i ni, nzuehɔɛ tí má i mi kun fieo, dama nzue n bo m má i ni, i wó i kunnu tie kabo bura nzue tie n wɔ, na i má i ɲɔɔ bo i la má awieeri ni.”

¹⁵ Na bara n ase i ka, “Ya si, ma m nyini nzue n be na m nu, adena má nzuehɔɛ ti m kun, na má m kaaki ba sa nzue fen kun.”

16 Na Yesu ase i ka, “Kɔ fere u hun na am bra.”

17 Na bara n ase Yesu ka, “M la má hun.” Na Yesu ase i ka, “Kabo a ɲa a la má hun ni, i ti nahɔre wɔ.

18 Dama nbiesɔm nnu ye a fite bu ajaa bu n a, na haari bo u ni yiri wo bere kisa mmɔɔ ni, i ti má u hun. A se nahɔre wɔ.”

19 Na bara n ase i ka, “Ya si, ma ɲu ka a ti Nyeme noanie kanfo ɔ.

20 Ya na Samariyafɔm yo suuri Nyeme ahin buka n su wɔ. Ama, ambere Yudafɔm ɲa wɔ yo daka ka sɔnɔ kere su Nyeme Yerusalem mie kpiri n nu wɔ.”

21 Na Yesu ase i ka, “Bara, de bo m suse u ni, sanɲa suba bo am sú má ya Si Nyeme ahin buka n su, wara Yerusalem mie n nu.

22 Ambere Samariyafɔm ɲa am su Nyeme wɔ, ama, am si má i. Ama, yere Yudafɔm si i, ye ya su i a. Dama tiide n fite Yudafɔm do ɔ.

23 Sanɲa suba bo wɔ ju awie, na bo bu su ya Si Nyeme ni, i Awiewie Casi ni búka bu ye bu sú i ni nahɔre su a. Dama nyini minem ɲusu ye ya Si Nyeme koro ka bu su i a.

24 Nyeme ti awiewie wɔ, nyini dee ti, bo bu su i ni, wɔ yo daka ka i Awiewie Casi n búka bu na bu sú i ni nahɔre su.”

25 Na bara n ase i ka, “Tɔ, m si ka Kristo Tiidefo ni bá. I ba juuri, i kán ya deke kere kere ya.”

26 Na Yesu ase i ka, “Mini bo m sujɔɔ u do ni, mini lee.”

27 Nyini sanɲa n nu na Yesu susufɔm n afite mie n kunnu aju, na jɔre n amie bu kabo Yesu ni bara n wo jɔɔ su ni. Ama, bu be abisa má bara n

ka, “A koro nzu i dɔ a?” Be gusu abisa má Yesu ka, “Nzu ti ye a sujɔɔ bara n dɔ a?”

²⁸ Na bara n ayaki i dundu n bɛɛ, na wɔ kpie i nyi akɔ miɛ n kunnu akɔ ase minem ka,

²⁹ “Am ba niɛ sɔnɔ be bo wɔ se m m tii su sa kɛɛ bo ma yo i. Beni, kisa, Kristo Tiidefɔ n lɛɛ fan?”

³⁰ Na minem n afite miɛ n nu, na bu kɔ Yesu dɔ.

³¹ Bara n kɔori n dɛɛ sin, na Yesu susufɔm n asere i ka, “Jande, ya Kerefɔ, di diire.”

³² Na wɔ se bu ka, “M la diire bo m di bo am si má i.”

³³ Na i susufɔm n abisa bu nɔnɔ nu ka, “Be afa diire aba ama i wɔ di wɔ, nzen sɛ?”

³⁴ Na wɔ se bu ka, “M diire n la ka, m yo yiri bo wɔ sunma m dɛɛ koroowa na m yó i juma n wie.”

³⁵ Na wɔ bo bu anyundɛɛ ase ka, “Am ɔa wɔ ka sara nna na am tambu fiesu nenɔgem. Ama, mini suse am wɔ lɛɛ, am tu am tii na am niɛ, fiesu diire n abi ni kpie.

³⁶ Sɔnɔ bo i kpie diire ni, i nya i ɔkatɔ, i ti ka sɔnɔ bo i tien mine nɔɔ, na bu nya ɔgɔɔ bo i la má awieeri ni, dɔfɔ ni kpiefɔ n kɛɛ nya ahorejɔ.

³⁷ Be bu ɔa ‘Be dɔ, na be kpie ni,’ i ti nahɔɛ wɔ.

³⁸ Ambere yiri, mini asunma am a, ka am kɔ kpie diire n bo am adɔ má i ni. I ti ka nbem adu mɔ akan Nyɛmɛ nɔaniɛ n akere minem, ye am dɛɛ la ka am ma bu yo m yarada. Nbem dɛɛ jumayoowa ye am sudi i kperɛ n a.”

³⁹ Bara n seeri minem bo bu fite miɛ n nu n kabo Yesu ase i tii su sa kɛɛ n dɛɛ ti, na

Samariyafom dongu bo bu fite mie n nu n ada Yesu nu.

⁴⁰ Nyini ti, bu ba juuri Yesu do ni, na ba sere i ka i ka bu do, na wo ko awo bu do ceen nnyo.

⁴¹ Na mine dongu ada i nu abuka su fa ko i noanie jooowa n ti.

⁴² Na ba se bara n ka, “Kisa, ma u dee jooowa n ngumi ti ye ya da i nu a, ama, yere mmoo ni ya tii ati i noanie jooowa, na ya si nu ka ahin sono n ti bo i baari ka i ba de durunya n nufom tii wo, nahore su.”

Kabo Yesu maari feme n kpien be wa nyaari laife ni

⁴³ Yesu woori bu do ceen nnyo n sin, na wo yasu bere ako Galili dee awore n nu.

⁴⁴ Dama yiri mmoo ni i tii adu mo akan ka Nyeme noanie kanfo la ma jirima i tiengu bosu.

⁴⁵ Sangha bo i ko juuri Galili ni, na ba de i ni bu sa nnyo, dama bu yo nuuri kabo i yoori alekutura sam ceenkpiri n sangha, Yerusalem mie kpiri n nu ni, dama bere mmoo yo koori nyini ceenkpiri n di ti.

⁴⁶ Na Yesu akaaki ako Kana, mie kpiri n bo i wo Galili awore n nu ni, deke bo i yo maari nzue kaakiiri nzan ni. Feme n kpien be woori do. I wa be la ma laife, i wo Kapenam mie kpiri n nu.

⁴⁷ Na sangha bo kpien n tiiri ka Yesu afite Yudiya dee awore n nu ako aju Galili ni, na wo ko Yesu do ako asere i ka i wa suwu, i ma bu ko na i ko tuntun i, na i nya laife.

⁴⁸ Na Yesu ase i ka, “Ma nu ka nzen am anu ma alekutura sam, am yo ma m yarada.”

49 Na kpien n ase i ka, “M Mibiε, bra ndende, má nyini, a cεeri, a bá ηu ka m wa n awu.”

50 Na Yesu ase i ka, “Kɔ. U wa n anya laifie.” Na wɔ de Yesu nɔaniε ni, na wɔ kaaki akɔ.

51 Na sanɔa bo i suko awuru ni, na i akɔom akpa i atin aba ase i ka, “U wa n anya laifie.”

52 Na wɔ bisa bu ka, “Sanɔa bonɔ ye i ηuniε n jɔori a?” Na ba se i ka, “Anuma wiesu kerefi kun sanɔa ye i ηuniε n jɔori a.”

53 Dɔ na baa n si n atenge su ka, nyini sanɔa n nu lεε, ye Yesu seeri i ka i wa n anya laifie n a. Na i ni i dikafɔm kere ada Yesu ηu.

54 Kabo Yesu ma baa n nyaari laifie ni, nyini tiiri i alekutura sa nnyɔ su bo i yoori sanɔa bo i fite Yudiya dεε awɔre n nu kɔori Galili n a, na i kere kabo i la yiko n bo i fite Nyeme dɔ.

5

Kabo Yesu tuntuunri sɔnɔ be kunma n nɔɔ su ni

1 Nyini sin na Yesu akɔ Yerusalem miε kpiri n nu na i kɔ di Yudafɔm cεenkpiri be.

2 Kunma be da dodoori anɔ n bo bu fa nbɔem fa sin wura miε n nu ni. Hiburur anie nu bu fere nyini kunma n ka Besata, i la kpatam nnu wɔ.

3 Landurifɔm beberebe dada kpatam n nu, bu nu nbem ti anyinsinm, nbem ti kujandafɔm, na bu nbem gusu ηuniε buekun awu bo bu koro yasú má. [

4 Bu da ηmindá dɔ, dama sanɔa sanɔa Nyeme mereke jura ba kunma n nu wɔ, na i ba kankan nzue n nu. Nzue kankanwa n dεε sin, na

landurifo n bo i du mo juraari nzue n nu, i tukpaki n koro i ti ka se, i yaki wo, na i nya laifie.]

⁵ Sono be woori bu nu bo wo da tukpaki i afo aburasan ni mocue lee.

⁶ Yesu nuuri i so ni, na wo fa nu ka sono n tukpaki n ace i nu, na wo bisa i ka, "A koro ka a nya laifie wo?"

⁷ Na tukpakifo n ase Yesu ka, "M Mibie, m la ma bukafobe bo nzue n nya ba kankan, na i kuku m wura nu. Sangha kere bo nzue n nya ba kankan, na m ba na m wura nu, a nu ka be adu m mo."

⁸ Na Yesu ase i ka, "Yasu, fa u dasu n na a nati."

⁹ Jinaabiri n nu bere na sono n anya laifie, na wo yasu afa i dasu n sunati.

Nyini ceen n bo Yesu tuntuunri sono n ti Numiyi ceen wo.

¹⁰ Nyini ti na Yudafo m nkpienkpienm n ase sono n bo wo nya laifie n ka, "Nyuma ti Numiyi ceen wo. Ya dee atin n su, atin wo ma nu bo a so u dasu ni."

¹¹ Na wo se bu ka, "Sono n bo i tuntuunri m ni, yiri seeri m ka m fa m dasu na m nati a."

¹² Na ba bisa i ka, "Nyini sono n la nma a, ye i seeri u ka a fa u dasu nati a?"

¹³ Ama, na sono n bo wo nya laifie n akoro asi ma i mi n bo i tuntuunri i ni, dama Yesu awura jama n nu ako.

¹⁴ Nyini sin na Yesu aba anu i, Nyeme Sereebiri Awuru n nu, na wo se i ka, "Ti fen. Kisa a nya laifie, ma a yo satie kun. Ma nyini, a di wahara bo i tara nyini n nusu."

¹⁵ Na sono n ako ase Yudafo nkpienkpienm ni ka Yesu tuntuunri i a.

16 Nyini ti, na ba kere Yesu wuwuruwa, dama wɔ tuntun sɔnɔ Nɔmiyi cɛɛn n dɛɛ ti.

17 Na wɔ se bu ka, “M Si toko yo juma haari ba ju ni nyuma, nyini ti ye m gusu yo a.”

18 Yesu jɔjɔri sɔ n dɛɛ ti, na Yudaƒɔm nkpiɛn-kpiɛnm n aboro bu nyi abuka su ka bu kun i. Má ka bo wɔ saaki Nɔmiyi cɛɛn n ciire n ɲgumi dɛɛ ti, ye bu kpi ka bu kun i a, ama, bo wɔ kaaki ase ka Nyɛmɛ ti i Si n dɛɛ ti. Nyini kere ka wɔ fa i ɲu abu Nyɛmɛ wɔ lɛɛ.

Kabo Yesu yiko ti barasu ni

19 Na Yesu ase bu ka, “Nahɔɛ ye m suse am a, mini Nyɛmɛ Wa n ni m tii, m koro bo má m tiɛnu yo má pui, má ka deke bo m ɲu ka m Si yo i ni, ye mini gusu yo i a.

20 Dama m Si Nyɛmɛ koro mini i Wa ni, na i sukere m deke kere bo i yo i ni, na i bá kere m sakpakpam bo m yó bu tara sɔ, na i yó am alekutura.

21 Kabo m Si Nyɛmɛ ye minem bo ba wu n su n na i ma bu ɲɔɔ ni, sɔ ye mini gusu ma minem bo ma yi bu ni ɲɔɔ a.

22 Dama m Si Nyɛmɛ ni i tii di má be jɔɛ, ama, wɔ fa jɔɛdi atin kere ama mini i Wa n wɔ,

23 adena sɔnɔ kere bu m kabo bu bu m Si ni. Sɔnɔ kere bo i bu má m, i mi abu má m Si bo wɔ sunma m n lɛɛ.

24 Nahɔɛ ye m suse am a, sɔnɔ kere bo i ti m nɔaniɛ n na i de i, na i da Nyɛmɛ bo wɔ sunma m n ɲu, i mi la ɲɔɔ bo i la má awieeri, na m dí má i mi jɔɛ. I mi afite yiwee nu anya ɲɔɔ lɛɛ.

25 Nahɔɛ ye m kaaki suse am a, ka sanƒa suba bo wɔ ju awie, na mine bo ba wu ni tí mini

Nyeme Wa n noanie ni, na bo bu tiiri i na bu deer i, bu nya ngoo.

²⁶ Dama kabo ngoo fite yiri m Si Nyeme do ni, so ye wo ma mini i Wa n gusu yiko ka m ma minem ngoo a,

²⁷ na wo kaaki ama m atin ka m di mine jore, dama m ti Adamande Wa a.

²⁸ Ma am ma ahin jooowam n yo am alekutura. Sang a suba bo mine bo ba wu n kere ti m noanie ni,

²⁹ na bu tenge bu yiwee n nu. Minem bo bu yo yoori sakpa ni, bu tenge na bu nya ngoo bo i la ma awieeri, na minem bo bu gusu yo yoori satie ni, bu tenge na bu nya suicin.”

Sam bo bu di Yesu nu daani ni

³⁰ Na Yesu asa su ase ka, “M koro bo ma m tieenu yo ma pui. Kabo Nyeme se m ni, so ye m di minem jore a. Nyini ti, m jore diiwa n ti nahore wo, dama m yo ma m de koroowa, ama, m yo yiri n bo wo sunma m n de koroowa a.

³¹ Nzen m di m nu daani kere am, am de ma ka i ti nahore,

³² ama, be wo bere bo i di m nu daani. Yiri la m Si Nyeme. Na m si ka i daani diiwa n ti nahore wo.

³³ Am yo sunmaari minem Yohane do, na wo se am nahore, kabo m ti barasu.

³⁴ M de ma adamande daani diiwa, ama, m kan kabo Yohane seeri am ni, adena am nya am tii.

³⁵ Yohane yo ti ka fitana bo i je na i ta a, na ambere ayo asoro su ka am wo i wein nu ni ahorejo fa ko sang a su.

³⁶ Ama, m la deke bo i di m ɲu daani bo i tara Yohane dɛɛ ni, yiri la sam bo m Si Nyɛmɛ akere m ka m yo bu wie ni. Nyini sam ni di m ɲu daani ka m Si asunma m a.

³⁷ Na m Si bo wɔ sunma m ni, yiri gusu adi m ɲu daani a. Am nya ti má i konvi, am kaaki nya ɲu má i kabo i ti barasu,

³⁸ na i nɔaniɛ wo má am ahore su, dama wɔ sunma m am dɔ, na am ada má m ɲu.

³⁹ Am kan Nyɛmɛ Jɔrɛ Kadasi n wɔ, na am fiiti i nu, dama am sunsun ka nyini kere am atin bo am fa na am nya ɲgɔɔ bo i la má awieeri a, ama, nyini kerɛɛwam nu di m ɲu daani a.

⁴⁰ Haari ni nyini n mmɔɔ am akete ka am ba má m dɔ na am ba nya ɲgɔɔ.

⁴¹ M koro má kansi adamande dɔ.

⁴² M si am sa, na m si ka, Nyɛmɛ dɛɛ koro n wo má am ahore su.

⁴³ Mini ade m Si jinaabiri aba, ye am ade má m, ama, nzen be baari ni i tiɛɲgu ba, am dé yiri wɔ.

⁴⁴ Amberɛ, am koro am ɲuɲu nu kansi wɔ, na bu susu am, ama, am koro má kansi yiri n ɲgumi bo i ti Nyɛmɛ n dɔ, nyini ti, i yo sɛ ye am koro da m ɲu a?

⁴⁵ Má am sunsun ka mini kó jarki am m Si Nyɛmɛ dɔ a. Am jarkifo la Moyisi, bo am la tama ka yiri búka am ni.

⁴⁶ Moyisi yo kerɛeri m ɲusu jɔrɛ wɔ. Nyini ti, nzen má am de i nɔaniɛ ni, má am de m gusu dɛɛ ni.

⁴⁷ Ama, am ade má kabo i yo kerɛeri i ni, i yó sɛ ye am koro de bo m suse am n a?"

6

Kabo Yesu maari nbiesom akpii nnu ni bu minem diire ni

¹ Nyini sin, na Yesu akpɛ akɔ Galili kunma kpiri n bo bu kaaki fere i ka Tiberiya n bukun dɔ.

²⁻⁴ Nyini saŋga, wɔ ka kaan, na Yudafom di bu Butara cɛenkpiri ni. Na jama beberebe asu i su, dama ba ɲu kabo wɔ yo alekutura sam atuntun tukpakifom na ba nya laifɛ ni. Na Yesu ni i susufom n afun akɔ atana buka be su.

⁵ Na Yesu atu i tii anie aɲu ka jama beberebe suba i dɔ, na wɔ bisa Filipu ka, “Ya nya diire nifansu wɔ, na ya to ma ahin minem kere a?”

⁶ Yiri mmɔɔ ni i tii si kabo i yɔ barasu, ama, i subo Filipu kunnu na i nie wɔ.

⁷ Na Filipu ase i ka, “Haari nzen ya faari ɲwaa beberebe toori diire maari bu, i jú má bo bu kere koro nya kan kan di.”

⁸ Na i susufom kun bo bu fere i ka Andere, na i gɔɔ la Simon Petoro n ase Yesu ka,

⁹ “Gbefene kaan be wo ya nu fen, i bita kpɔɔ nnu ni jombaa nnyɔ, ama, i koro ju má ahin minem kere.”

¹⁰ Wura mɔne sunnu bere, na Yesu ase i susufom ka, “Am ma minem kere tantana wura n su.” Na ba ma minem kere atantana. Nbiesom ɲgumi kɔ yasuuri mine akpii nnu wɔ.

¹¹ Na Yesu afa kpɔɔ n na wɔ da Nyeme asi, na wɔ kpakpaaki i nu ama minem bo bu tantana ni, na wɔ kaaki afa jombaa n ayo i sɔ, na bu kere anya kabo bu koro.

¹² Bu kerε diiri na bu kunnu yiiri ni, na wɔ se i susufɔm n ka, “Am tientien sinsin n bo ba di i na wɔ ka n nɔɔ. Má am ma be ka ngbεen.”

¹³ Na ba tientien kpɔnɔ sinsin n bo ba di i na wɔ ka n nɔɔ, na wɔ yi kandie buru ni nnyɔ.

¹⁴ Minem n ηuuri nyini alekutura sa n bo Yesu yoori ni, na ba se ka, “Nahɔre, ahin sɔnɔ n ti Nyeme nɔanie kanfɔ n bo bu seeri ka i bá durunya n nu n a.”

¹⁵ Yesu faari nu ka bu koro ka bu tara i fanɔa, na bu fa i yo bu femε n dεε ti, na wɔ yasu afite bu nu yiri ngumi, akɔ buka n su.

Kabo Yesu natiiri nzue su ni

¹⁶ I naasɔ sanɔa, na Yesu susufɔm n ajura akɔ kunma kpiri n nu,

¹⁷ na ba kɔ awura lee nu ka bu kaaki kpie kɔ Kapenam mie kpiri n nu. Ale aba asan kerε, na Yesu nya ba má bu dɔ,

¹⁸ na anuma sukpie fanɔa su, na nzue nyama gusu suyasu.

¹⁹ Nyini sanɔa ni, i susufɔm n wo nzue n su akɔ aju kunma kpiri n afien, na ba ηu Yesu ka i nati nzue n su suba dodo lee ni, na sere ati bu.

²⁰ Na Yesu ase bu ka, “Mini a, má am ma sere ti am.”

²¹ Na ba ma wɔ wura lee n nu. Jinaabiri n nu bere, na ba ju deke bo bu sukɔ ni.

Kabo jama n sunienie Yesu busu ni

²² Alecin na jama n bo bu kaari kunma kpiri n buekun dɔ n afa nu ka lee kun n kpein woori kunma n su anuma n a. Na ba si nu ka Yesu

susufom n ngumi wuraari lee n nu koori a, ama, yiri mmoo ni i tii awura má nu.

²³ Na lee nbem afite miε n bo bu fere i ka Tiberiya n aba aju kunma n nɔɔ su, fa dodo deke bo Yesu sereeri Nyeme gɔɔri kpɔnɔ n su maari minem na bu diiri ni.

²⁴ Na jama n anie, ba ɲu má Yesu ni i susufom n bere, nyini ti, na ba wura leem n nu akɔ Kapenam kɔ sunienie Yesu busu.

Kabo Yesu ɲa yiri ti diire n bo i ma ngɔɔ n a

²⁵ Minem n kɔ ɲuuri Yesu kunma kpiri n buekun dɔ ni, na ba bisa i ka, “Ya Kerefɔ, sanɲa bɔnɔ ye a baari fen a?”

²⁶ Na wɔ se bu ka, “Nahɔre ye m suse am n a, má alekutura sam bo m yoori bu n ti ye am sunienie m busu a, ama, kabo m maari am diire na am kunnu ayi n dεε ti a.

²⁷ Má am ma am nyunu boro diire bo i saaki n busu, ama, am ma am nyunu boro diire bo i wie má, na i ma ngɔɔ bo i la má awieeri n busu. Mini Adamande Wa ni má am nyini diire n a, dama mini ngumi, ye m Si Nyeme ase m nyaari akere ka m ti i dεε a.”

²⁸ Na ba bisa i ka, “Ya yo se koro yo juma n bo Nyeme koro ka ya yo i n a?”

²⁹ Na Yesu abɔ bu nu ka, “Juma n bo Nyeme koro ka am yo i n la ka, am yo mini bo wɔ sunma m yarada.”

³⁰ Na ba bisa i ka, “Ye a yó nzu alekutura sa kere ya, na ya ɲu i na ya yo u yarada? A yó sa bɔnɔ ɔ?”

³¹ Dama sanɲa bo ya nam yo woori boro kpantain nu ni, bu diiri diire be bo bu fere i ka

mana n wɔ. Kabo ba kɛrɛ i Nyɛmɛ Jɔrɛ Kadasi n nu lɛɛ, ka yiri maari bu diire n bo i fite angoro ye bu diiri a.”

³² Na Yesu ase bu ka, “Nahɔrɛ ye m suse am n a, má Moyisi yo maari nyini diire n bo i fite angoro n a, ama, m Si Nyɛmɛ maari am diire n bo i fite angoro nahɔrɛ su a.

³³ Dama diire n bo Nyɛmɛ ma n la bo i fite angoro, na i ba ma durunya n nufɔm ηƔɔɔ ni.”

³⁴ Na ba se i ka, “Ya Mibiɛ, ηka a ma ya nyini diire n sanga kɛrɛ.”

³⁵ Na Yesu ase bu ka, “Mini ti diire n bo i ma ηƔɔɔ n a. Sɔnɔ kɛrɛ bo i ba m dɔ, ahɔɛ ti má i mi, na sɔnɔ kɛrɛ bo i yo m yarada, nzuehɔɛ ti má i mi kun.

³⁶ Ama, ma se am, haari ni bo am aɲu m n kɛrɛ, am suyo má m yarada.

³⁷ Sɔnɔ kɛrɛ bo m Si fa i maari m, i bá m dɔ, na wɔrɔ kɛrɛ bo a ba m dɔ, m kété má u fieo.

³⁸ Dama ma fite má angoro aba má ka m ba yo m dɛɛ koroowa, ama, m baari ka m ba yo Nyɛmɛ bo wɔ sunma m dɛɛ koroowa a.

³⁹ Yiri n bo wɔ sunma m dɛɛ koroowa la ka, minem kɛrɛ bo wɔ fa ama m ni, má m ma bu be mmɔɔ mini, ama, i koro ka m tɛɲge bu kɛrɛ jina cɛɛn na bu nya ηƔɔɔ.

⁴⁰ Dama m Si koroowa la ka, sɔnɔ kɛrɛ bo i ηu mini i Wa n na i yo m yarada, i mi nyá ηƔɔɔ bo i la má awieeri, na m tɛɲge i jina cɛɛn.”

⁴¹ I seeri ka yiri ti diire n bo wɔ fite angoro aba n dɛɛ ti, na minem ni sunɲuti i.

⁴² Na ba se ka, “Má Yosefu wa Yesu n lɛɛ? Ya si i si ni i ni kɛrɛ e. Ye i baari sɛ, ye i ηa i fiteeri

aṅgoro baari a?”

⁴³ Na Yesu ase bu ka, “Má am ṅuṅuti am ṅuṅu nu.

⁴⁴ Be koro ba má m dɔ, má ka m Si Nyeme bo wɔ sunma m ni, acin i mi adodo m, na m tɛnge i mi jina cɛɛn.

⁴⁵ Kabo Nyeme noanie kanfɔm yo kereeri lee, ka, ‘Nyeme kere sɔnɔ kere nyaari a.’ Na sɔnɔ kere bo i ti Nyeme kereewa n na i siiri nu, i mi bá m dɔ.

⁴⁶ Nyini kere má ka be adu mɔ aṅu Nyeme wɔ lee, má ka mini ṅgumi bo m fite m Si Nyeme dɔ n aṅu i a.

⁴⁷ Nahɔre ye m suse am n a, ka sɔnɔ kere bo i yo m yarada, i la ṅɔɔ bo i la má awieeri.

⁴⁸ Mini ti diire n bo i ma ṅɔɔ n a.

⁴⁹ Am nam yo diiri diire n bo bu fere i ka *mana* n boro kpantain nu, ama, na ba wu.

⁵⁰ Ama, ahin diire n ti diire barasu be bo i fite aṅgoro wɔ, na sɔnɔ kere bo i diiri i, i wú má.

⁵¹ Mini ti diire n bo wɔ fite aṅgoro aba, na i ma ṅɔɔ n a. Sɔnɔ kere bo i di ahin diire ni, i nyá ṅɔɔ bo i la má awieeri. Diire n bo m má n la m ṅuniɛmbaa ni, bo m fá ma durunya n nufɔm, na bu nyá ṅɔɔ ni.”

⁵² Yesu seeri sɔ ni, na yaa ati bu, na bu suse akuruwa bu ṅuṅu nu ka, “Ahin sɔnɔ ni yo se koro fa i ṅunie ma ya na ya di a?”

⁵³ Na Yesu ase bu ka, “Nahɔre ye m suse am n a, má ka am di mini Adamande Wa n ṅuniɛmbaa ni, na am nu m dɛɛ mbunja ni, ambere ni am tii la má ṅɔɔ n bo i la má awieeri ni.

54 Sɔnɔ kɛrɛ bo i di m dɛɛ ɲuniɛmbaa ni, na i nu m mbunja ni, i mi la ɲɔɔ n bo i la má awieeri ni, na m tɛŋge i mi jina cɛɛn.

55 Dama m dɛɛ ɲuniɛmbaa ni, ti deke bo i ti diire nahɔrɛ su a, na m mbunja n ti deke bo i ti nuuwa nahɔrɛ su a.

56 Sɔnɔ kɛrɛ bo i di m dɛɛ ɲuniɛmbaa ni, na i nu m mbunja ni, i mi wo ni mini, na mini gusu wo ni yiri lɛɛ.

57 Yiri m Si bo i ma ɲɔɔ ni sunmaari m a, i dɛɛ ti, ye m la ɲɔɔ a, sɔ ye sɔnɔ kɛrɛ bo i di m ɲuniɛmbaa ni, mini dɛɛ ti, ye i nyá ɲɔɔ a.

58 Ahin ni ti diire n bo wɔ fite aɲgoro aba n a, i ti má ka diire n bo am nam yo diiri na i sin na bu wuuri ni. Sɔnɔ kɛrɛ bo i di ahin diire ni, i nyá ɲɔɔ n bo i la má awieeri.”

59 Yesu kereeri nyini kereewa n kɛrɛ saɲga bo i wo Kapenam bu tientienbunɔɔ sɔɔ nu n wɔ.

Kabo Petoro seeri ka Yesu ti sɔnɔ bo i ma ɲɔɔ n bo i la má awieeri n a

60 Yesu susufɔm dɔɲgu tiiri i jɔjɔɔwa n sɔ ni, na ba se ka, “Ahin kereewa n ti kekereke. Nma koro de i a?”

61 Na Yesu afa nu ka bu sunɲuti fa kɔ i kereewa n su, na wɔ se bu ka, “Ahin jɔjɔɔwa n dɛɛ ti ye am koro ka am kaaki am sin n a?”

62 Ye nzen má am ɲu ka mini Adamande Wa n sukaaki sufun kɔ aɲgoro, deke bo m fite baari ni, má am se se wɔ lɛɛ?

63 Awiewie Casi ni ma mine ɲɔɔ a. Adamande yiko be koro ma má ɲɔɔ. Nɔaniɛ n bo ma jɔjɔ akere am ni, yiri ma am nya Awiewie Casi n bo i ma ɲɔɔ n a.

⁶⁴ Ama, am be n mmɔɔ ada má m ηu.” Má pui ti, fite san̄ga bo Yesu boori i juma n bu ni, ye i si bo bu yo má i yarada n a, ni sɔnɔ n bo i bá tɔ i ni.

⁶⁵ Na wɔ se bu ka, “Nyini dɛɛ ti ye ma se am ka be wo má bɛɛ bo i koro ba m dɔ, má ka m Si ama atin ka i mi yo m susufɔ.”

⁶⁶ I seeri sɔ n sin, na i susufɔm dɔŋgu akaaki ayaki i ka bu su má i su kun.

⁶⁷ Na wɔ bisa i susufɔ buru ni nnyɔm ni ka, “Amberɛ gusu koro ka am kaaki yaki m wɔ fan?”

⁶⁸ Na Simon Petoro abɔ i nu ka, “M Mibiɛ, ya kó ηma dɔ a? Wɔrɔ ti sɔnɔ n bo i la nɔaniɛ n bo i ma ηgɔɔ n bo i la má awieeri n a.

⁶⁹ Ye ya yo u yarada, na ya si ka wɔrɔ ti sɔnɔ casi n bo a fite Nyemɛ dɔ n a.”

⁷⁰ Na Yesu abɔ nu ka, “M ηa am buru ni nnyɔ ye m yiiri am e, má sɔ? Ama, am nu kun ti Sitana sɔnɔ ɔ.”

⁷¹ I jɔjɔ niiri Yudasi wɔ, Simon Isikariyoti wa ni. Yiri Yudasi tiiri buru ni nnyɔm ni kun wɔ, ama, yiri bá tɔ Yesu n a.

7

Kabo Yesu ni i niemam boori anzama barasu ni

¹ Nyini sin na Yesu afa Galili awɔrɛ n nu subara yɛ, wɔ koro má ka i kɔ Yudiya dɛɛ awɔrɛ n nu, dama Yudafɔm nkpienkpienm koro ka bu kun i wɔ.

² Nyini san̄ga, wɔ ka kaan na Yudafɔm di bu cɛɛnkpiri be bo bu fere i ka Nambue Bo cɛɛnkpiri ni.

³ Na Yesu niemam ase i ka, “Fite ahin awɔre n nu na a kɔ Yudiya, adena u susufɔm gusu kɔ ɲu sam bo a yo bu ni.

⁴ Dama sɔnɔ kere bo i koro ka mine si kabo i ti barasu, i fa má i sayoowa fie má minem sin, nzen a yo alekutura sam wɔ, ma durunya n nufɔm kere si u sa.”

⁵ I niemam n mmɔɔ ayo má i yarada, nyini ti ye bu seeri sɔ n a.

⁶ Na Yesu ase bu ka, “M saɲga nya ju má, ama, amberɛ yiri, saɲga kere bo am koro, am kɔ ɔ.

⁷ Amberɛ ye durunya n nufɔm koro kpɔ má am a, ama, bu kpɔ mini wɔ, dama m se bu wɔ, ka bu sayoowam ti má kpa.

⁸ Am kɔ cɛɛnkpiri n di, m kɔ má, dama m saɲga nya ju má.”

⁹ I seeri bu sɔ ni, na wɔ ka Galili dɔ lee nnyɔ.

Kabo Yesu kɔ diiri Nambue Bo cɛɛnkpiri ni

¹⁰ I niemam kɔɔri ka bu kɔ di cɛɛnkpiri ni, na Yesu gusu aba asa bu su, ama, wɔ yi má i ɲu fofoe nu, i fie kɔɔri a.

¹¹ Na Yudaɔm nkpienkpienm ni sunienie i, na ba bisa ka, “Ye i wo ni wɔ?”

¹² Na jama n sutu asuturi bu benggu dɔ i busu. Nbem ɲa, “I ti sɔnɔ kpa a.” Ye nbem gusu ɲa, “Ai, i dadaka minem wɔ.”

¹³ Ama, be akoro akan má i jɔre fofoe nu, dama bu kere soro Yudaɔm nkpienkpienm n wɔ.

¹⁴ Saɲga bo ba di cɛɛnkpiri n akɔ aju afien ni, na Yesu akɔ awura Nyeme Sereebiri Awuru n nu, sukere minem.

15 Na Yudafom nkpienkpienm n ayo alekutura, na ba bisa ka, “I yo se ye ahin sono n la nyini si n nusu so a, bo be akere ma i a?”

16 Na Yesu ase bu ka, “Deke bo m fa kere am ni, i ti ma m tiengu kereewa, ama, m Si Nyeme bo wo sunma m ni, yiri kere m kabo m kere a.

17 Sono kere bo i na i yo Nyeme koroowa ni, ye i si kabo m kereewa n ti a, nzen m kereewa n fite Nyeme do, wara m tiengu kereewa.

18 Sono kere bo i jojo i koroyanu, i mi koro ka bu kansi i wo, ama, bo i koro ka bu kansi sono bo i sunma i ni, nyini sono ni jojo nahore a, na kore be wo ma i nu.

19 M na Moyisi yo maari am Nyeme noanie kpamaawa n a, ma so? Ama, am be n mmoo su ma i atin su. Ye nzu ti ye am koro ka am kun ma a?”

20 Na jama n ase i ka, “Ajini wo u nu. Nma koro ka i kun u a?”

21 Na Yesu ase bu ka, “Sa kun be lee, ye ma yo i n a, ye wo yo am kere alekutura n a.

22 Moyisi yo maari am noo ka am wura am nbaabiesom kenkenne lemocue een, nzen haari i to Numiyi een n mmoo, am yo i, ama, ma Moyisi yo boori i bu ka bu wura kenkenne n a, am nam yo boori i bu a.

23 Am wura nbaabiesom kenkenne Numiyi een wo, adena ma am bu noanie kpamaawa n bo Nyeme fa maari Moyisi ni ngbeen, ye nzen ma tuntun sono momo kun Numiyi een n na wo nya laifie, nzu ti ye am afa yaa m nu a?

24 Ma am nie sono nyunu dika na am di i jore, ama, am si i wo nahore su, na am nya di i jore.”

Kabo minem bisaari ka Yesu ti Kristo Tiidefo n a

²⁵ Yesu seeri so ni, na Yerusalemfom nbem abisa bu njuju nu ka, "Ma ahin sono n ye Yudafo nkpienkpienm koro ka bu kun i n a?"

²⁶ Am nie e. Wo yi i nu fofoe nu ye i jjo a. Be suse ma i pui mmoo. Beni, Yudafo nkpienkpienm asi ka yiri ti Kristo Tiidefo n nahore su n a.

²⁷ Ama, sanja bo Kristo Tiidefo n ba baari, be si ma deke bo i fite. Ahin sono n yiri, ya si deke bo i fite."

²⁸ Na sanja bo Yesu sukere Nyeme Sereebiri Awuru n nu ni, na wo tien fanga su ase ka, "Am sunsun ka am si m nahore su, nzen se? Ye am si deke bo m fite? Ma ba ma ni m dee yiko nu wo. Yiri n bo wo sunma m ni ti nahorefo a, ama, am si ma i.

²⁹ Mini si i a, dama m fite i do o, yiri sunmaari m a."

³⁰ Nyini ti, na ba kpi ka bu tara i, ama, be afa ma i saa akan ma i, dama i sanja nya ju ma.

³¹ Na jama n dongu ayo i yarada, na ba se ka, "Sanja bo Kristo Tiidefo n ba baari, i yo alekutura sam tara ahin sono n wo, nzen se?"

Kabo bu sunmaari tintinijinafom ka bu ko tara Yesu ni

³² Na Farasifom n ati kabo jama n sutu asuturi sukan Yesu jore, na bu ni Nyeme sayoowa donguyofo nkpienkpienm n asunma tintinijinafom ka bu ko tara i.

³³ Na wo se ka, "M wo am do sanja kaan, na m nya ba ko yiri n bo i sunmaari m n do.

³⁴ Am bá nienie m busu, na am nǵú má m. Deke bo m bá wo ni, am koro kó má dɔ.”

³⁵ Na Yudafoṃ nkpienkpienm n abisa bu nǵuṃ nu ka, “Yiri koro ka i kɔ ni wɔ, ye yeɛ koro nǵu má i a? I kó ya minem dɔ ɔ, bo ba sandi awura Girikifoṃ asien su ni, na i kó kere Girikifoṃ ni Nyeme jɔɛ ni, nzen se a?”

³⁶ I nǵa se wɔ lɛɛ? Bo i nǵa ya bá nienie i busu na ya nǵú má i ni, na bekun, deke bo i sukɔ ni, ya koro kó má dɔ.”

Kabo sɔnɔ bo i yo Yesu yarada nya nzue n bo i ma nǵɔɔ ni

³⁷ Cɛenkpiri n awieeri cɛen n ti cɛenkpiri n tii a. Nyini cɛen n na Yesu ayasu ajina, na wɔ tien fanǵa su ase ka, “Sɔnɔ kere bo nzuehɔɛ ati i, i mi bra m dɔ na i ba nu.

³⁸ Dama ba kere i Nyeme Jɔɛ Kadasi n nu ka, sɔnɔ kere bo i yo m yarada, ‘Nzuetin bo i ma nǵɔɔ ni, i sɔnǵi fite i mi ahorembaa su a.’ ”

³⁹ Yesu jɔjɔ niiri Awiewie Casi n wɔ, ka sɔnɔ kere bo i yo yiri Yesu yarada nyá Awiewie Casi ni. Nyini sanǵa ni, Nyeme nya fa má i Awiewie Casi n ma má, dama wɔ nya wura má Yesu kpiri.

Kabo Yesu dɛɛ ti, na jama n nɔɔ woori bu nǵunǵumi ni

⁴⁰ Na jama n nu mine nbem tiiri kabo i seeri sɔ ni, na ba se ka, “Ahin sɔnɔ n ti Nyeme nɔanie kanfo n wɔ nahɔɛ su.”

⁴¹ Na nbem ase ka, “Yiri ti Kristo Tiidefo n a.” Ama, na nbem gusu ase ka, “Kristo Tiidefo ni fite má Galili da.

42 Ba kere i Nyeme Jore Kadasi n nu ka Kristo Tiidefo ni yo Feme Davidi anuma a, na bu wu i Betilehem, Feme Davidi bosu wo.”

43 Yesu dee ti, na jama n noo awo bu ngungumi,

44 na nbem akoro ka bu tara i, ama, be afa ma i saa akan ma i.

Kabo Yudafom nkpienkpienm ayo ma Yesu yarada ni

45 Na tintinijinafom n akpie bu nyi ako Nyeme sayoowa doguyofom ni, ni Farasifom n do, na ba bisa bu ka, “Nzu ti ye am afa ma i aba ma?”

46 Na tintinijinafom n abo bu nu ka, “Be nya koro joo ma kabo nyini sono n joo ni.”

47 Na Farasifom n abisa bu ka, “Wo daka ambere gusu wo fan?”

48 Am nya ti ka Yudafom nkpienkpienm wara Farasifom n be ayo i yarada a?

49 Ama, ahin jama n si ma Nyeme noanie kpamaawa ni, nyini ti, Nyeme ayo bu ngbeen.”

50 Na Nikodemo bo i ti Farasifom kun n na i yo ko nuuri Yesu ni, ase bu ka,

51 “Ya dee atin n su, kana ya ba di sono jore jara i, ma ka ya bisa i na ya ti sa bo wo yo i n ka.”

52 Na ba bisa i ka, “Woro n mmoo fite Galili wo? Kan Nyeme Jore Kadasi n na a nie. A nu ma ka Nyeme noanie kanfo n be mmoo fite Galili.”

[
53 Bu se so wieeri ni, na bu kere asandi ako awuru.

8

¹ Na Yesu ako buka n bo bu fere i ka Oliva Buka n su, dama oliva bakam go su wo.

Bara ajaafɔ n bo i saakiiri ajaa ciire n jɔrɛ

² Alecin ngarama fuun na Yesu akaaki ako Nyeme Sereebiri Awuru n nu. Na jama n kere aba atien bu noo i do. Na wo tana sukere bu Nyeme noanie.

³ Na Nyeme noanie kerefom, ni Farasifom nbem afa bara ajaafɔ be bo bu ko taraari i ka i ni bieso da, na ba fa i ajina bu afien.

⁴ Na ba se Yesu ka, "Ya Kerefɔ, ya ko atara ahin bara n ka i susaaki ajaa ciire wo.

⁵ Noanie kpamaawa n bo Nyeme fa maari Moyisi n kere ka, nyini nbaram nusu so, ya tu bu yabue bo kun bu. Nyini ti, ye woro na se?"

⁶ Bu seeri so n na bu so i ngeɛ, na bu jarki i wo. Na Yesu abiri i tii asienngu sufa i saa maraka sukere asienngu.

⁷ Bu wo i bisa n su ni, na wo ye i tii su ase bu ka, "Bo i na wo nya yo ma satie am nu, ma i mi du mo tu i yabue."

⁸ Na wo kaaki abiri i tii sukere asienngu.

⁹ Bu tiiri so ni, na bu kere aloroki kun kun ako. Nkpienm ni du mo a. Na wo ka Yesu ni bara ni ngumi.

¹⁰ Na Yesu aye i tii su, na wo bisa bara n ka, "Bara, bu wo ni? Be ase ma ka i ti ye ni ka bu kun u, nzen se?"

¹¹ Na bara n abo i nu ka, "Ai, m Mibie, be ase ma ka i kun m." Na Yesu ase i ka, "Mini mmoo se ma ka be kun u. Ko, ama, ma a yo satie kun."]

Kabo Yesu ɲa yiri ti durunya n nufɔm wein n ni

¹² Na Yesu akaaki ase jama n ka, “Mini ti durunya n nufɔm wein a. Bo i su m su kere wo má awosin nu kun, ama, i nyá wein bo i ma ɲɔɔ ni.”

¹³ Na Farasifɔm n ase i ka, “Wɔɔɔ, a sudi u ɲu daani wɔ, be de má u daani n ka i ti nahɔɔɔ.”

¹⁴ Na Yesu ase bu ka, “Haari nzen m di m ɲu daani n mmɔɔ, m daani diiwa n ti nahɔɔɔ wɔ, dama m si deke n bo m fite baari, na m kaaki si deke bo m sukɔ ni. Ama, amberɔ, am si má deke bo m fite, na am kaaki si má deke bo m sukɔ n gusu.

¹⁵ Amberɔ, am di jɔɔɔ kabo durunya n nufɔm di bu beɲɲum jɔɔɔ n wɔ, ama, mini ni m tii, m di má be jɔɔɔ.

¹⁶ Ama, haari nzen m di mine jɔɔɔ n mmɔɔ, m jɔɔɔ diiwa n ti nahɔɔɔ wɔ, dama má mini ɲɲumi di minem jɔɔɔ a, ama, mini ni m Si bo i sunmaari m ni di a.

¹⁷ Ba kere am Nyeme nɔɔnie kpamaawa n nu ka, nzen mine nnyɔ daani diiwa yo kun, nyini la ka i ti nahɔɔɔ wɔ lɔɔ.

¹⁸ Mini ni m tii di m ɲu daani a, na m Si bo wɔ sunma m gusu di m daani.”

¹⁹ Na ba bisa i ka, “U si wo ni?” Na wɔ bo bu nu ka, “Am si má m ni m Si n be n mmɔɔ. Nzen má am si mini, má am si m Si n mmɔɔ.”

²⁰ Saɲga bo Yesu seeri sɔ ni, i wo minem kere su Nyeme Sereebiri Awuru n nu, fa dodo deke bo bu yi bu saraka ɲwaa fa ma Nyeme n wɔ. Ama, be akoro atara má i, dama i saɲga nya ju má.

Kabo Yesu seeri ka i fite má durunya n nu fɛn ni

²¹ Na Yesu akaaki ase bu ka, “M bá kɔ yaki am, na am bá nienie m busu, ama, am nɔ́ má m, na am bá wu ni am satie ni. Deke bo m sukɔ ni, am koro kɔ má dɔ.”

²² Na Yudafoɔm n abisa ka, “I n̄a deke bo i sukɔ ni, ya koro kɔ má dɔ. Nyini la ka, i kún i n̄u wɔ lɛɛ, nzen se a?”

²³ Na wɔ se bu ka, “Ambere fite durunya n nu fɛn wɔ, ama, mini fite angoro wɔ. Ambere ti durunya n nu fɛn fɔm wɔ, ama, mini fite má durunya n nu fɛn.

²⁴ Nyini ti ye ma se am ka, am wú ni am satie n a, dama nzen am yo má m yarada ka mini la sɔnɔhɔre n bo m se am ka m ti ni, am wú ni am satie n wɔ.”

²⁵ Na ba bisa i ka, “Ye wɔrɔ la n̄ma a?” Na Yesu ase bu ka, “Kabo m se am san̄ga kere ni, m ti sɔ ɔ.

²⁶ M la sa dɔngɔ bo m jɔjɔ fa kɔ am dɔ, na m la sa dɔngɔ bo m fa di am jɔre jaraiki am, ama, yiri bo i sunmaari m ti nahɔrefɔ ɔ, na deke bo i se m ni, nyini ye m kan kere durunya n nufɔm a.”

²⁷ Yesu seeri sɔ ni, ba si má ka i jɔjɔ niiri i Si Nyeme wɔ.

²⁸ Na wɔ se bu ka, “Am bá yeeri mini Adamande Wa n su baka jaanu n su, ye am sí ka mini la sɔnɔhɔre n bo m se am kabo m ti n a, na m yo má deke be m deɛ yiko nu, ama, m se kabo m Si akere m wɔ.

²⁹ Yiri bo i sunmaari m n wo m dɔ, wɔ nya yaki má m cɛen be, dama san̄ga kere m yo deke bo i sun i nu wɔ.”

³⁰ I jɔjɔri sɔ ni, na jama n dɔŋgu ayo i yarada.

Kabo Yesu seeri Yudafɔm ka bu satie dɛɛ ti ma ba yo akɔɔm n a

³¹ Na Yesu ase Yudafɔm bo bu yo i yarada n ka, “Nzɛn am de m nɔaniɛ ni, am ti m susufɔm wɔ nahɔɛ su.

³² Na am sɪ deke bo i ti nahɔɛ ni, na nahɔɛ ni mǎ am nya am tii a.”

³³ Na ba se i ka, “Ya ti Abraham anumam wɔ, be nya fa mǎ ya yo mǎ i akɔɔm. Ye nzu ti ye a ŋa ya nyǎ ya tii a?”

³⁴ Na Yesu ase bu ka, “Nahɔɛ ye m suse am a, ka, sɔnɔ kɛɛ bo i yo satie, i mi ti satie akɔɔ.

³⁵ Akɔɔbaa koro ka mǎ awuru n nu sanɔa kɛɛ, ama, awurubaa yiri wo awuru n nu wɔ sanɔa kɛɛ.

³⁶ Nyini ti, nzɛn mini awurubaa n nya deeri am tii jiri, am nyǎ am tii nahɔɛ su.

³⁷ M si ka am ti Abraham anumam wɔ, ama, am koro ka am kun m wɔ, dama am ade mǎ m nɔaniɛ ni.

³⁸ Deke bo mini aɲu i m Si dɔ n ye m suse am a, ama, amɛɛ, deke bo am ti i am si dɔ, ye am yo a.”

³⁹ Na ba se i ka, “Ya si la Abraham.” Na wɔ se bu ka, “Nzɛn mǎ am ti Abraham nbaam, mǎ am yo i sayoowa a.

⁴⁰ Kabo i ti ni, ma se am nahɔɛ sam bo m tiiri i Nyɛmɛ dɔ n wɔ, ama, am koro ka am kun m wɔ. Abraham ayo mǎ nyini be sɔ.

⁴¹ Amɛɛ, am yo am si sayoowa a.” Na ba se i ka, “Yɛɛ, ya ti mǎ soma nbaam. Ya si la Nyɛmɛ ŋgumi wɔ.”

⁴² Na Yesu ase bu ka, “Nzen má Nyeme ti am Si, má am koro m, dama m fiteeri Nyeme do o, ye m baari fen n a. Ma ba má ni m dee yiko nu, ama, yiri sunmaari m a.

⁴³ Nzu ti ye am ti má m jójówa n bu a? Dama am koro de má m noanie n dee ti.

⁴⁴ Sitana ti am si wo, na am koro ka am yo kabo am si koro n wo, i fite ka i bumboori kere, i ti sono kunfo o, na i su má nahore su, dama nahore haari kun mmoo wo má i do, i dee la ka i bu kore wo, dama yiri ti korefo a, na yiri kaaki ti korefom kere si a.

⁴⁵ Ama, mini se nahore n ti, am de má m noanie ni.

⁴⁶ Am nma koro kere m satie bo ma yo i a? Nzu ti ye m se am nahore, ye am de má m noanie n a?

⁴⁷ Sono kere bo i ti Nyeme dee, i mi ti Nyeme noanie wo. Deke bo i ti na am ti má Nyeme noanie n la ka, am ti má i deem wo.”

Kabo Yesu ti kpiri tara Abraham ni Nyeme noanie kanfom ni

⁴⁸ Na Yudafom n ase i ka, “Bo ya na a ti Samariyafoo, na ajini wo u nju ni, i ti má nahore wo, nzen se a?”

⁴⁹ Na Yesu ase bu ka, “Ajini wo má m nju, ama, m bu m Si n wo, ye amere bu má m.

⁵⁰ M sukoro má ka mine wura m nju kpiri wo, be wo bere bo i koro ka i wura m kpiri, yiri ti joredifo a.

⁵¹ Nahore ye m suse am a, ka, sono kere bo i bita m noanie ni, i mi wu má fieo.”

⁵² Na ba se i ka, “Kisa, ye ya si ka ajini wo u nju a. Abraham ni Nyeme noanie kanfom ni kere

awu, ama, wɔɔ ɲa sɔɔ kɛɛ bo i bita u nɔaniɛ ni, i mi wú má fieo.

⁵³ A tara ya si Abraham bo wɔ wu n wɔ? I ni Nyeme nɔaniɛ kanfɔm kɛɛ awu. A bu u ɲu sɛ wɔ?”

⁵⁴ Na Yesu ase bu ka, “Nzen m wura m ɲu kpiri, i ti ɲgbɛɛn wɔ. M Si wura m kpiri a, yiri bo am ɲa i ti am Nyeme ni,

⁵⁵ ama, am si má i. Mini si i a. Haari nzen m ɲa m si má i, m yó kɔɛfɔ ka amɛɛɛ wɔ. Ama, m si i, na m bita i nɔaniɛ ni.

⁵⁶ I yoori am si Abraham fie ka i ɲu m ba n nu, i ɲuuri i, na i ahore ajɔ.”

⁵⁷ Na ba se i ka, “A nya ju má afɔ aburunu, ye i yo sɛ ye a ɲa a ɲuuri Abraham a?”

⁵⁸ Na Yesu ase bu ka, “Nahɔɛ ye m suse am a, kana bu ba wuuri Abraham ni, mini wo bɛɛɛ wɔ.”

⁵⁹ I seeri sɔ ni, na ba fa yabue ka bu bo kun i, ama, na wɔ lɔɔki afite Nyeme Sereebiri Awuru n nu.

9

Kabo Yesu tekeeri anyinsin be nyumbaa ni

¹ Na sanɲa bo Yesu wo natiiri su ni, na wɔ ɲu sɔɔ be, bu wuuri i ni, i ti anyinsin wɔ.

² Na i susufɔm n abisa i ka, “Ya Kɛɛfɔ, nzu ti ye bu wuuri ahin sɔɔ ni anyinsin a? I wufɔm yoori satie, nzen i dɛɛ satie a?”

³ Na Yesu ase bu ka, “I ti má i ni i wufɔm be mmɔɔ satie dɛɛ ti, ama, Nyeme koro ka minem ɲu kabo i yo alekutura sa fa ma i a.

⁴ Kabo wiε toko wo bere ni, am ma ya yo yiri n bo wɔ sunma m juma ni. Ale bá san bo be koro yo má juma be.

⁵ Kabo m toko wo durunya n nu ni, mini ti durunya n nufɔm wein a.”

⁶ Yesu seeri sɔ ni, na wɔ yi nanzue agɔ asiεngu, na wɔ fa akpita naatie afa abɔrɔki anyinsin nyumbaa nnyɔ n kere.

⁷ Na wɔ se i ka, “Kɔ na a kɔ ηmisi u nyunu Silowam bura n nu.” Silowam n bu la ka, ba sunma i wɔ. Na wɔ kɔ aηmisi i nyunu n na wɔ ηu asi, na wɔ kaaki aba awuru.

⁸ Na i lamɔkɔm ni minem bo bu yo ηuuri i sanɔa kere ka i sere ni, abisa ka, “Má ahin sɔnɔ ni yo tana fen sere n a?”

⁹ Nbem ηa, “Yiri a.” Nbem gusu ηa, “Má yiri a. I feremafɔ a.” Na yiri n mmɔɔ ni i tii suse bu ka, “Mini a.”

¹⁰ Na ba bisa i ka, “Ye i yoori se ye u nyumbaa n ateke a?”

¹¹ Na wɔ se bu ka, “Sɔnɔ n bo bu fere i ka Yesu ni, yiri kpitaari naatie bɔrɔkiiri m nyumbaa n a. Na wɔ se m ka m kɔ Silowam bura n nu, na m kɔ ηmisi m nyunu. Na ma kɔ aηmisi, kpenɔga na ma ηu asi.”

¹² Na ba bisa i ka, “Ye yiri n wo ni?” Na wɔ se bu ka, “M si má.”

Kabo Farasifɔm bisaari sɔnɔ n fa kɔ i nyumbaa tekeewa n su ni

¹³ Na ba fa sɔnɔ n bo i yo tiiri anyinsin n ako Farasifɔm dɔ.

14 Nyini cɛɛn n bo Yesu kpitaari naatie na i fa tekeeri anyinsin nyumbaa n tiiri Njumiyi cɛɛn wɔ.

15 Nyini ti, na Farasifɔm gusu akaaki abisa i ka, “I yoori sɛ ye a njuuri asi a?” Na wɔ se bu ka, “I faari naatie bɔrɔkiiri m nyumbaa n a, na ma n̄misi i, na ma n̄ju asi.”

16 Na Farasifɔm nbem ase ka, “Ahin sɔnɔ n fite má Nyɛmɛ dɔ, dama i bita má Njumiyi cɛɛn ciire ni.” Ama, na nbem gusu ase ka, “I yo sɛ ye satie-yofɔ koro yo alekutura sam ka ahin n̄jusu sɔ a?” Na bu kɛrɛ nɔɔ awo i n̄gun̄gumi.

17 Na ba kaaki abisa sɔnɔ n bo i yo tiiri anyinsin bekun ka, “Ye wɔrɔ bo wɔ teke u nyumbaa ni, a bu i sɛ wɔ?” Na wɔ se ka, “I ti Nyɛmɛ nɔan̄iɛ kanfɔ ɔ.”

18 Yudafɔ nkpienkpienm n ade má ka i yo tiiri anyinsin wɔ, ye i n̄ju asi kisa, má ka bu ba fereeri i si, ni i ni,

19 na ba bisa bu ka, “Am wa n bo am n̄a am wuuri i na i ti anyinsin ni, yiri la ahin? Ye i yoori sɛ ye i n̄ju asi kisa a?”

20 Na i si, ni i ni abɔ bu nu ka, “Ya si i ka i ti ya wa a, ya wuuri i anyinsin wɔ.

21 Ama, ya si má kabo i yoori barasu na i koro n̄ju asi kisa ni, yere gusu kaaki si má sɔnɔ bo i tekeeri i nyumbaa ni. Wɔ ju i tien̄gu sɔnɔ, am bisa i, yiri mmɔɔ ni i tii sé am.”

22 Deke bo i ti na i si, ni i ni seeri sɔ ni, bu soroori Yudafɔ nkpienkpienm n ahore wɔ, dama Yudafɔ nkpienkpienm n adu mɔ ase ka sɔnɔ kɛrɛ bo i seeri ka Yesu ti Kristo Tiidefɔ ni, bu fɔn̄ i mi fite bu tientienbunɔɔ sɔɔ n nu wɔ.

23 Nyini dɛɛ ti ye i si, ni i ni seeri ka, “Wɔ ju i tienɔgu sɔnɔ, am bisa yiri mmɔɔ ni i tii n a.”

24 Na ba kaaki afere sɔnɔ n bo i yo tiiri anyinsin n bekun, na ba se i ka, “Niɛ Nyɛmɛ ti, na a jɔjɔ nahɔrɛ. Yɛrɛ si ka ahin sɔnɔ n ti satieyofɔ ɔ.”

25 Na wɔ se bu ka, “Nzen i ti satieyofɔ ɔ, i ti má satieyofɔ ɔ, mini si má. Deke bo m si i n la ka, m yo tiiri anyinsin wɔ, ama, kisa m ɲu asi.”

26 Na ba bisa i ka, “I yoori u sɛ wɔ, ye i tekeeri u nyumbaa n sɛ wɔ?”

27 Na wɔ bɔ bu nu ka, “Ma du mɔ ase am kabo i tekeeri m nyumbaa ni, ye am ade má. Ye nzu ti ye am koro ka m kan kere am bekun a? Ambɛrɛ gusu, am koro ka am yo i susufɔm wɔ, nzen sɛ?”

28 Na ba tɔ i ɲu ni nzukɔ kpɛ ase i ka, “Wɔrɔ ti nyini sɔnɔ n susufɔ a, yɛrɛ yiri, ya ti Moyisi dɛɛ susufɔm wɔ.

29 Ya si ka Nyɛmɛ yo jɔjɔri Moyisi dɔ a, ama, nyini sɔnɔ n yiri, ya si má i fiteebiri n mmɔɔ.”

30 Na wɔ se bu ka, “Ahin ti alekutura wanla, am si má i fiteebiri, ama, wɔ teke m nyumbaa.

31 Ya si ka Nyɛmɛ de má satieyofɔ nyemesere, ama, sɔnɔ kɛrɛ bo i su Nyɛmɛ atin su, na i yo i sa koroowa, Nyɛmɛ de i sere wɔ.

32 Fite durunya n bumboori, sɔnɔ be nya ti má ka be ateke sɔnɔ bo bu wuuri i na i ti anyinsin nyumbaa.

33 Nzen má ahin sɔnɔ n afite má Nyɛmɛ dɔ, má i koro yo má pui.”

34 Na ba se i ka, “Wɔrɔ yiri, bu wuuri u satieyofɔ ɔ, ye wɔrɔ koro ka a kere yɛrɛ a?” Na ba fon i afite.

Kabo Yesu ɲa bo bu de má Adamande Wa n ti anyinsinm ni

³⁵ Yesu tiiri ka ba fɔn ayi sɔnɔ n ni, na wɔ kɔ aɲu i, na wɔ bisa i ka, “A yo Adamande Wa n yarada a?”

³⁶ Na sɔnɔ n abisa i ka, “M Mibiɛ, yiri la ɲma a? Se m na m yo i yarada.”

³⁷ Na Yesu ase i ka, “A ɲu i e, yiri la mini n bo m sujɔɔ u dɔ ni.”

³⁸ Na sɔnɔ n ase i ka, “M Mibiɛ, ma yo u yarada.” Na wɔ kutu Yesu nyunu akansi i.

³⁹ Na Yesu ase ka, “M baari durunya n nu ka m ba di minem jɔrɛ wɔ, na bo bu ɲu má asi n ɲú asi, na bo bu ɲu asi n yó anyinsinm.”

⁴⁰ Farasifɔm nbem bo bu woori i bi dɔ n tiiri sɔ ni, na ba se i ka, “Nka a ɲa a se ka yɛrɛ gusu ti anyinsinm wɔ lɛɛ fan?”

⁴¹ Na Yesu ase bu ka, “Nzen má am ti anyinsinm, má am la má ɲgasi, ama, kabo am nya ɲa am ɲu asi ni, am toko la ɲgasi lɛɛ.”

10

Kabo Yesu boori miɛɛnu niiri bɔɛsasafɔ ni

¹ Na Yesu ase ka, “Nahɔrɛ ye m suse am a, sɔnɔ bo i lɔrɔki wura nbɔɛm sɔɔ n nu, na wɔ fa má anɔ n nu awura má, i mi ti awiefɔ ɔ, na i kaaki ti sɔnɔ bo i nati fin minem di wɔ.

² Sɔnɔ bo i fa anɔ n wura nbɔɛm sɔɔ n nu, yiri ti nbɔɛm sasafɔ n a.

³ Anɔ niefɔ ni teke anɔ n ma i a, na i fere i dɛɛ nbɔɛm n duma, na i nbɔɛm ni ti i konvi, na i fa bu fite.

⁴ Nzen i nya faari i nbɔem kere fiteeri, i du bu mɔ ɔ, na i dɛɛ nbɔem n su i su, dama bu si i konvi.

⁵ Sɔnɔ bo bu si má i, bu sù má i su fieo, bu ñmáti yaki i wɔ, dama bu si má i konvi.”

⁶ Na Yesu abo ahin miɛnu n akere bu, ama, ba ti má i bu.

Kabo Yesu ña yiri ti bɔesasafo kpa n ni

⁷ Ba ti má miɛnu n bu n ti, na Yesu akaaki ase bu bekun ka, “Nahɔre ye m suse am a, mini ti nbɔem anɔ n bo bu fa wura sɔɔ n nu n a.

⁸ Bere kere bo bu duuri m mɔ baari, na bu yo bu ñu ka bu nie nbɔem su ni, bu ti awiefɔm wɔ, ni minem bo bu nati fin minem di wɔ, ama, nbɔem n ade má bu jɔjɔwa ni.

⁹ Mini ti anɔ n a, na sɔnɔ kere bo i fa m dɛɛ anɔ n wuraari, i nyá tiide, na i wúra na i fite, na i nyá i diire di.

¹⁰ Awiefɔ dɛɛ la ka i ba wɔ ɔ, na i kun, na i saaki. Mini aba ka bu nyá ñgɔɔ bo i la má anusu.

¹¹ Mini ti bɔesasafo kpa n a. Bɔesasafo kpa n tɔ i ñgɔɔ ɔ, na i wu ma i nbɔem ni.

¹² Padifo n bo ba fa i ka i sasa nbɔem n ti má bɔesasafo nahɔre su, na nbɔem n ti má i dɛem. Nyini ti, nzen i ba ñuuri ka bedi suba, i ñmati yaki nbɔem wɔ. Na bedi n wura bu nu tara nbem, na bo ba ka n sandi.

¹³ I ti padifo n dɛɛ ti, na i cɛɛ wo má nbɔem n nu, nyini ti ye i ñmati yaki bu n a.

¹⁴⁻¹⁵ Mini ti bɔesasafo kpa n a. Kabo m Si Nyeme si m na m si i ni, sɔ ye mini gusu si m dɛɛ nbɔem a, na bu gusu si m. Na m tɔ m dɛɛ ñgɔɔ na m wu ma bu.

¹⁶ M la nbœ nyinga nbem bo bu ti m dæm, bo bu wo má ahin nbœm n nu. Wɔ yo daka ka m fa bu gusu ba wura ahinm n nu. Bere gusu tí m konvi na bu dé i, na bu yó kun na bu sasafɔ yó kun.

¹⁷ M tɔ m dæe ηgɔɔ fa ma m minem, na m káaki de i bekun, nyini dæe ti ye m Si koro m n a.

¹⁸ Be sude má m dæe ηgɔɔ ni m dɔ, ama, mini ni m tii sutɔ i m koroyanu a. M la atin bo m tɔ m dæe ηgɔɔ ni, na m kaaki la atin bo m de i bekun. M Si maari m nɔɔ ka m yo sɔ a.”

¹⁹ Yesu seeri sɔ n dæe ti, na Yudafo nkpien-kpienm n nɔɔ awo i ηgunɔgumi bekun.

²⁰ Na bu dɔnɔgu n ase ka, “Ajini wo i ηu, nyini dæe ti, wɔ bo fiε a. Nzu ti ye am so am sui i dɔ a?”

²¹ Ama, nbem ηa, “Má sɔnɔ bo ajini wo i ηu jɔjɔwa la ahin. Ajini yo se koro teke anyinsin nyumbaa?”

Kabo Yudafoṃ keteeri Yesu ni

²² Fufuku sanɔga na Yudafoṃ ba sudi bu cœn-kpiri n Yerusalem miε kpiri n nu, na bu tenɔge su kabo bu yo tekeeri Nyεmε Sereebiri Awuru n ni, na bu yoori i dɔnɔgu ni.

²³ Na Yesu sunati bara ye Solomon Lεε n bo i wo Nyεmε Sereebiri Awuru n nu ni.

²⁴ Na Yudafoṃ nbem atien bu nɔɔ abara ayε i, na ba bisa i ka, “Sanɔga bɔnɔ ye a bá kan teke ya nyi a? Nzen wɔrɔ ti Kristo Tiidefoṃ n a, se ya nahɔre kpain.”

²⁵ Na Yesu ase bu ka, “Ma se am, ye am ade má a. Alekutura sam bo m yo bu m Si duma n nu ni, di m ηu daani a.

²⁶ Ama, am yo má m yarada, dama am ti má m dɛɛ nbɔɛm.

²⁷ M dɛɛ nbɔɛm ti m konvi. M si bu, na bu su m su.

²⁸ M ma bu ɲɔɔ bo i la má awieeri, na bu ká má ɲgbɛɛn cɛɛn be fieo. Be gusu koro fin má bu fite má m saa nu.

²⁹ M Si bo i faari bu maari m ni, tara deke kɛɛ faɲga, na be wo má bɛɛ bo i koro fin bu fite m Si saa nu.

³⁰ Mini ni m Si ti deke kun wɔ.”

³¹ Na Yudaɓɓ afa yabuɛ bekun ka bu bo kun i.

³² Na Yesu ase bu ka, “Ma yo alekutura sakpam dɔɲgu, bo m Si kereeri m na am aɲu i, ye sa bɔɔ ti ye am ɲa am kun m n a?”

³³ Na Yudaɓɓ n ase i ka, “Má sakpam bo a yo bu n be dɛɛ ti ye ya ɲa ya kún u a, ama, bo a jɔjɔ wura Nyɛɛ ɲgasi nu n ti, dama a ti adamande wɔ, ama, na a se ka a ti Nyɛɛ wɔ.”

³⁴ Na wɔ se bu ka, “Ba kɛɛ i am Nyɛɛ Jɔɛ Kadasi n nu ka, Nyɛɛ ɲa, ‘Am ti ka Nyɛɛ wɔ.’

³⁵ Be koro bu má Nyɛɛ Jɔɛ Kadasi ni ɲgbɛɛn. Nyɛɛ yo seeri bu ka bu ti ka Nyɛɛ wɔ, bɛɛ bo bu deerɪ Nyɛɛ nɔaniɛ ni,

³⁶ ama, mini yiri, m Si Nyɛɛ ayi m, ye wɔ sunma m durunya n nu a. Ye nzu ti ye ambɛɛ ɲa ma kan ciire jɔɛ, dama m ɲa mini ti Nyɛɛ Wa a?

³⁷ Nzen m yo má m Si juma ni, má am yo m yarada.

³⁸ Ama, nzen m yo bu na haari am yo má m yarada mmɔɔ a, am yo m juma n yarada, adena am si nahɔɛ su ka mini ni m Si n ti deke kun wɔ.”

³⁹ I seeri sɔ ni, na ba kpi ka bu tara i bekun, na wɔ lɔrɔki afite bu nu.

⁴⁰ Na Yesu akaaki akpɛ akɔ Yodan kunma n buekun dɔ akɔ aju deke bo Yohane yo biɛri minem Nyemɛ nzue ni, na wɔ wo dɔ.

⁴¹ Na jama beberebe aba i dɔ, na ba se ka, “Yohane ayo má alekutura sa be, ama, jɔjɔwa kɛrɛ bo i yo jɔjɔ fa kɔɔri ahin sɔnɔ n ɲusu n ti nahɔrɛ wɔ.”

⁴² Na minɛ dɔŋgu ayo i yarada dɔ.

11

Kabo Lazarosi wuuri ni

¹ Na sɔnɔ be bo bu fere i ka Lazarosi n ada tukpaki. I ninbaam la Mariya ni Marata. Bu bɔsu la Betani.

² Nyini Mariya n bo i niwa Lazarosi daari tukpaki ni, yiri ba faari tulaalɛ nvanvanifo gɔɔri Yesu jaa su ye i faari i tiɲmie tintiin nunukaari i n a.

³ Na i ninbaa nbaabaram n asunma ka bu kɔ se Yesu ka, “Ya Mibiɛ, u danfo n bo a koro i agaya n ada tukpaki.”

⁴ Yesu tiiri sɔ ni, na wɔ se ka, “Ahin tukpaki n ti má yiwee tukpaki, ama, i yo sɔ, na minem ɲu Nyemɛ jirima woowa kabo i ti, na Nyemɛ ma minem ɲu mini bo m ti i Wa n gusu jirima woowa.”

⁵ Tɔ, Yesu koroori Marata ni Mariya ni bu niwa Lazarosi.

⁶ Ama, i tiiri ka Lazarosi ada tukpaki ni, na wɔ ka deke bo i woori n cɛɛn nnyɔ abuka su.

⁷ Nyini sin na Yesu ase i susufɔm ka, “Am ma ya kaaki kɔ Yudiya dɛɛ awɔrɛ n nu.”

⁸ Na i susufom n ase i ka, “Ya Kerefɔ, má anzoni fen ye Yudafom ɲa bu tu yabue bo kun u n a? Ye a sukoro ka ya kpie ya nyi kɔ do bekun n a?”

⁹ Na Yesu ase bu ka, “Fa ɲgarama kɔ ju naaso, m ɲa i ti wie kun wɔ e. Sɔnɔ bo i nati wiesu bo má i jaa, dama durunya n nu wein ni ma i ɲu asi a.

¹⁰ Ama, sɔnɔ bo i nati kɔɲgue bo i jaa, dama wein wo má i do.”

¹¹ Yesu jɔjɔri sɔ n sin, na wɔ kaaki ase bu ka, “Ya danfo Lazarosi adaafi, ama, m sukɔ na m kɔ tenge i lɛɛ.”

¹² Na i susufom n ase i ka, “Ya Mibiɛ, nzen wɔ daafi wɔ, i nyá laifiɛ.”

¹³ Kabo Yesu seeri n la ka, Lazarosi awu wɔ, ama, i susufom bere sunsun ka i ɲa wɔ daafi nahɔre su wɔ.

¹⁴ Nyini ti, na Yesu ase bu kpain ka, “Lazarosi awu.

¹⁵ Ama, ambere dɛɛ ti, wɔ yo m fie ka ma wo má do, adena am yo yarada. Am ma ya kɔ i do.”

¹⁶ Na Tomasi bo bu fere i ka Ndaa n ase i lamɔkɔ susufom n ka, “Am ma yere gusu kɔ, nzen bu kɔ kuunri i a, na ya ni yiri kere awu.”

Kabo Yesu ɲa yiri tenge minɛm yiwee nu ni

¹⁷ Saɲga bo Yesu kɔ juuri ni, i ɲuuri ka ba se Lazarosi i lenna lɛɛ.

¹⁸ Betani ni Yerusalem miɛm waari má ni i beɲgu.

¹⁹ Na Yudafom doɲgu aba Marata, ni Mariya do ka bu ba dada bu ahore, bu niwa n bo wɔ wu n dɛɛ ti.

²⁰ Marata tiiri ka Yesu suba ni, na wɔ kpa i atin, ama, na Mariya aka awuru.

21 Na Marata ase Yesu ka, “M Mibiε, nzen má a woori fen, má m niwa n awu má.

22 Ama, haari ni nyini mmoo, m si ka deke kere bo a sere Nyeme, i yó i ma u.”

23 Na Yesu ase i ka, “U niwa ni tenge i yiwee n nu bekun.”

24 Na Marata ase i ka, “M si ka i bá tenge i yiwee nu jina cεen, sanɔa bo Nyeme bá tenge minem bu yiwee nu ni.”

25 Na Yesu ase i ka, “Mini ti sono bo i tenge minem bu yiwee nu, na i má bu ngoo n a. Sona kere bo i yo m yarada, haari nzen i wuuri, i nyá ngoo.

26 Na sono kere bo i la ngoo na i yo m yarada, i mi wu má fieo. A yo ahin jooowa n yarada a?”

27 Na Marata ase i ka, “M Mibiε, ma yo yarada ka woro ti Nyeme Wa, Kristo Tiidefo n a, bo i na i sunma i durunya n nu ni.”

Kabo Yesu suunri ni

28 Marata seeri so n sin, na wo kaaki ako afere i niwa Mariya benle, na wo se i ka, “Ya Mibiε n aba, i na a bra.”

29 Mariya tiiri so ni, i kaba bereki yasuuri wo, na wo ko i do.

30 Nyini sanɔa, na Yesu nya ju má mie n nu, i toko wo deke bo Marata ko tuuri i n wo.

31 Na Yudafom bo bu woori awuru n nu Mariya bi, na bu sudada i ahore ni, bu nuuri kabo i bereki yasu fiteeri ni, na ba su i su. Bu sunsuunri ka i sukoo deke bo bu seeri Lazarosi n wo, na i ko sun.

32 Sanɔa bo Mariya ko juuri deke bo Yesu wo n na i nuuri i ni, na wo kutu i nyunu, na wo se i

ka, “M Mibiε, nzen má a woori fεn, má m niwa n awu má.”

³³ Yesu ηuuri ka i susun ni, ni kabo Yudafom n bo bu suuri i su baari n gusu wo sun su ni, na i ahore asaaki, na wɔ mi i ηumi.

³⁴ Na wɔ bisa bu ka, “Am seeri i ni wɔ?” Na ba se i ka, “Ya Mibiε, bra na a ba niε.”

³⁵ Na Yesu asun.

³⁶ Nyini ti na Yudafom n ase ka, “Am niε kabo i koro i agaya barasu a.”

³⁷ Ama, na bu nbem ase ka, “Yiri n bo i teke anyinsin n nyumbaa ni, má i koro tuntun má sonɔ ni, na i wu má, nzen se?”

Kabo Yesu tengeeri Lazarosi i yiwee nu ni

³⁸ Na Yesu ahore asaaki bekun, na wɔ kɔ deke bo bu seeri Lazarosi ni. I ti yabue bue fanƙunma wɔ, ye bu faari i seeri nu a, na ba fa yabue nyinga atɔ anɔ ni.

³⁹ Na Yesu ase bu ka, “Am ba yi yabue ni.” Na sonɔ n bo wɔ wu n niwa Marata ase i ka, “M Mibiε, kisa wɔ bun, dama bu seeri i nyuma lenna lεε.”

⁴⁰ Na Yesu ase i ka, “Ma se má u ka, nzen a yoori m yarada, a ηú Nyεmε jirima woowa kabo i ti barasu?”

⁴¹ I seeri sɔ ni, na ba lakati yabue ni. Na wɔ ye i tii su angoro, na wɔ se ka, “M Si, m da u asi ka a de m sere.

⁴² M si ka sanga kεε a de m sere wɔ, ama, ahin minem bo bu jina fεn n dεε ti, ye m seeri sɔ a, adena bu yo m yarada ka wɔɔ sunmaari m a.”

⁴³ I sereeri Nyεmε n wieeri ni, na wɔ tien ase ka, “Lazarosi, fite.”

44 Na sɔnɔ n bo wɔ wu n afite faŋkunma n nu. Tani pɔɔndiiri i saa, ni i jaa, na tani kun pɔɔndiiri i tii. Na Yesu ase bu ka, “Am nyanɔi yi tani n na am ma i kɔ.”

Kabo bu sɛsɛɛri su ka bu kun Yesu ni

45 Yudafɔm dɔŋgu bo bu baari Mariya dɔ ŋuuri sa n bo Yesu yoori i ni, na ba yo i yarada.

46 Na bu nbem akɔ Farasifɔm n dɔ akɔ ase bu kabo Yesu ayo ni.

47 Na Farasifɔm ni Nyɛmɛ sayoowa dɔŋguyofɔ nkpiɛnkpiɛnm n afere Yudafɔm tereterefɔm ni, na ba tien bu nɔɔ. Na ba se ka, “Ye ya yo sɛ wɔ? Am niɛ e, ahin sɔnɔ ni suyo alekutura sayoowam dɔŋgu.

48 Nzen ya yaki i na i suyo sɔ, minem kɛrɛ yɔ i yarada a, na Roma yikofɔm bá saaki ya Nyɛmɛ Sereebiri Awuru ni, na bu kún ya minem ni.”

49 Na bu nu sɔnɔ be bo bu fere i ka Kayafasi ni, bo i ti Nyɛmɛ sayoowa dɔŋguyofɔm kɛrɛ kpiɛn nyini afɔ n ase ka, “Amberɛ, am si má pui.

50 Am si má kabo i ti n wɔ, nzen sɛ? Ka nzen am ma sɔnɔ kun wu maari minem kɛrɛ, i ti ye ni bo ya minem kɛrɛ bá wu ni.”

51 Má i koroyanu ye i seeri sɔ a, ama, yiri ti Nyɛmɛ sayoowa dɔŋguyofɔm kɛrɛ kpiɛn nyini afɔ n ti, ye Nyɛmɛ ma i seeri ka Yesu wú ma Yudafɔm n a.

52 Na má bɛrɛ ŋgumi dɛɛ ti ye i wú a, ama, adena i tien Nyɛmɛ nbaam nɔɔ, na bu yo kun, bɛrɛ bo ba sandi akɔ asien nbem n su.

53 Nyini dɛɛ ti, fite nyini cɛɛn n fa kɔ, na ba sɛsɛ su ka bu kun Yesu.

⁵⁴ Nyini dɛɛ ti, wɔ yi má i ɲu fofoe nu anati má Yudafoɔm nu kun. Ama, i fiteeri bere ni, na wɔ kɔ awɔre be bo i wo dodo boro kpantain dɛɛ bue ni, na i ni i susufɔm n akɔ awo miɛ n bo bu fere i ka Efirayim n su.

⁵⁵ Nyini saɲga, wɔ ka kaan, na Yudafoɔm di bu Butara cɛɛnkpiri ni, na mine dɔɲgu afite ahemem aba Yerusalem miɛ kpiri n nu, na bu ba kpakpara bu ɲu fin ka, na cɛɛnkpiri n nya ju.

⁵⁶ Na ba nienie Yesu busu, na saɲga bo bu wo Nyeme Sereebiri Awuru n nu ni, na ba bisa bu ɲuɲu nu ka, “Am sunsun se wɔ? I bá cɛɛnkpiri ni? Ya de má ka i bá.”

⁵⁷ Ama, Nyeme sayoowa dɔɲguyofɔ nkpien-kpienm ni, ni Farasifoɔm n ama nɔɔ ka sɔnɔ kere bo i si deke bo Yesu wo, i se bu na bu kɔ tara i.

12

Kabo Mariya faari tulaaleɛ nvanvanifo gɔɔri Yesu jaam su ni

¹ Na saɲga bo i ba kaari lesen, na bu di Butara cɛɛnkpiri ni, na Yesu akɔ Betani, Lazarosi bɔsu, yiri bo Yesu tengeeri i yiwee n nu ni.

² Na ba su Yesu wɔfɔ dɔ. Marata faari diire n ba maari bu a, Lazarosi gusu woori minem bo bu ni Yesu diiri diire n nu.

³ Na Mariya afa tulaaleɛ nvanvani bo i la gɔ agaya tuwa bambaka kun, na wɔ fa ago Yesu jaa su, na wɔ fa i tiɲmie tintiin anunuka i jaam kere su, na tulaaleɛ ni nvani ade awuru n kere.

⁴ Na Yesu susufɔm kun bo bu fere i ka Yudasi Isikariyoti bo i bá tɔ Yesu n abisa ka,

⁵ “Nzu ti ye bara n atɔ má tulaalɛɛ n na i nya nɔwaa beberebe, na ya fa ma jaarifɔm a?”

⁶ I ti awiefɔ n dɛɛ ti ye i seeri sɔ a, má ka i cɛɛ wo jaarifɔm nu wɔ. Yiri ti bu nɔwaa bitafɔ a, na i suwɔ nɔwaa n be sanɔa sanɔa.

⁷ Na Yesu ase ka, “Yaki Mariya benle, i dɛɛ nzee bo i sufa yo m fa kɔ m yiwee cɛɛn lɛɛ.

⁸ Dama am ni jaarifɔm ni wo bere sanɔa kɛɛ a, ama, am ni mini koro wo má bere sanɔa kɛɛ.”

⁹ Yudafɔm beberebe tiiri ka Yesu woori dɔ ni, na ba ba i dɔ, má ka Yesu nɔgumi ti ye bu baari a, ama, bu baari ka bu ba nɔ Lazarosi n bo Yesu tengeeri i yiwee n nu n wɔ.

¹⁰ Nyini dɛɛ ti, na Nyeme sayoowa dɔnguyofo nkpienkpienm n asese su ka bu kun Lazarosi gusu.

¹¹ Dama i dɛɛ ti ye Yudafɔm dɔnɔa akaaki bu sin abo bu a, ye ba yo Yesu yarada n a.

Kabo Yesu wuraari Yerusalem ka femɛ dɛɛ su ni

¹² Na alecin na jama n bo bu baari ka bu ba di Butara cɛɛnkpiri n ati ka Yesu suba Yerusalem miɛ kpiri n nu.

¹³ Na ba kpiekpie kpakpa nyawa akɔ akpa i atin, na bu subo kuyigindi, bu nɔa,

“Hosana. Ya kansu Nyeme.

Terefiɛ wo yiri n bo i suba Micera n dɛɛ duma n nu n dɔ.

Terefiɛ wo Yisarelifɔm femɛ n dɔ.”

¹⁴ Na Yesu anɔ kaakobaa be, na wɔ fun atana su, kabo ba kɛɛ i Nyeme Jɔɛ Kadasi n nu ni,

¹⁵ “Ambere Siyonfɔm, má am soro sere.

Am niε, am fεmε ni suba n a,
i fun kaakobaa wɔ.”

16 Nyini saŋga, i susufɔm nya si má nyini sam n bo ba yo n kerε bu. Má ka saŋga bo Yesu ba tengeeri i yiwee n nu, na bu ŋuuri i jirima woo-wa n sin, na ba nya atenge su, ka ba kerε i Nyeme Jɔre Kadasi n nu ka bu yó i sɔ ɔ, na ba kaaki atenge su, ka ba yo i sɔ nahɔre su.

17 Na jama n bo bu yo woori Yesu dɔ, saŋga n bo i fereeri Lazarosi fiteeri faŋkunma n nu, na i tengeeri i yiwee n nu ni, na bu sukan labari ni.

18 Nyini alekutura sa n bo i yoori i na minem tiiri n dεε ti, na ba kpa i atin.

19 Na Farasifɔm n ase bu ŋuɔ nu ka, “Am aɔu má i? Ya koro yo má pui kun. Yiri ye durunya n nufɔm kerε susu i su n a.”

Kabo Girikifɔ nbem ba bisaari Yesu busu ni

20 Minem bo bu baari Yerusalem miε kpiri n nu Butara cεenkpiri n saŋga n ka bu ba su Nyeme ni, bu nbem ti Girikifɔm wɔ.

21 Na ba ba Filipu dɔ, i fite miε n bo bu fere i ka Besayida na i wo Galili awɔre n nu n wɔ. Na ba se i ka, “Njabiε, ya koro ka ya ŋu Yesu wɔ.”

22 Na Filipu akɔ ase Andere, na bu nnyɔ n kerε akɔ ase Yesu.

23 Na Yesu ase ka, “Saŋga n aɔu bo Nyeme wúra mini Adamande Wa n kpiri.

24 Nahɔre ye m suse am n a, má ka alembaa awura fa nu, na wɔ kpɔrɔ, i ti i tii wɔ. Ama, nzen i wuraari fa nu na i kpɔrɔori, ye i wúra mbaa beberebe a.

²⁵ Sɔnɔ kɛrɛ bo i koro i ngɔɔ, i mi bá fun i, ama, sɔnɔ kɛrɛ bo i koro má i ngɔɔ durunya n nu fɛn, i mi bá nya ngɔɔ bo i la má awieeri.

²⁶ Sɔnɔ kɛrɛ bo i su m, wɔ yo daka ka i mi su m su, na deke bo m wo ni, m amusuisufɔ gusu wó dɔ ɔ. Na sɔnɔ kɛrɛ bo i suuri m, m Si Nyɛmɛ wúra i mi kpiri.”

Kabo Yesu jɔjɔ fa kɔɔri i yiwee n jɔrɛ su ni

²⁷ Na Yesu ase ka, “Kisa, m ahore asaaki, ye m se sɛ wɔ? M koro se ka, m Si Nyɛmɛ, yi m fite ahin anyumboro bo i suba m dɔ n nu, nzen sɛ? Ai, m koro se má sɔ, dama nyini dɛɛ ti ye m baari a.

²⁸ M dɛɛ bo m se la ka, m Si, kere kabo u jirima woowa ti.” Na akonvi be atien afite angoro ase ka, “Ma du mɔ akere kabo m jirima woowa ti, na m káaki kere i bekun.”

²⁹ Jama n bo bu jina Yesu bi n tiiri akonvi ni nga ni, na bu nbem ase ka, “Nzue akpura.” Na nbem gusu ase ka, “Nyɛmɛ mɛrɛke ajɔjɔ i dɔ a.”

³⁰ Na Yesu ase bu ka, “Ambere dɛɛ ti ye akonvi n jɔjɔri a, má mini dɛɛ ti a.

³¹ Saŋga n aju bo Nyɛmɛ dí durunya n nufɔm jɔrɛ, na i fón yi Sitana bo i ti bu fɛmɛ ni.

³² Ama, mini, bu ba yɛeri m su jinaari angoro baka jaanu n su, m cín sɔnɔ kere ba m dɔ.”

³³ Kabo i yo seeri sɔ n kere yiwee n bo i bá wu i n wɔ.

³⁴ Na jama n ase i ka, “Ya ti i Nyɛmɛ Jɔrɛ Kadasi n nu ka, Kristo Tiidefɔ ni wo bere saŋga kɛrɛ. I wú má. Ye i yoori sɛ ye wɔrɔ ŋa, wɔ yo daka ka bu bá yɛeri Adamande Wa n su jinaari

angoro baka jaanu n su a? Ye Adamande Wa n la nma a?”

³⁵ Na Yesu ase bu ka, “Mini bo m ti wein ni, m wo am nu kisa, ama, m cé má. Nyini dɛɛ ti, am nya wo ni wein ni, am sunati wein nu wɔ, na má awosin tu am. Sɔnɔ kɛɛ bo i wo awosin nu, i mi si má deke bo i sukɔ ni.

³⁶ Am nya wo ni wein ni, am yo i yarada, na m má am yo wein dɛɛ nbaam.” Yesu seeri sɔ ni, na wɔ fite bu nu akɔ afiɛ deke be, na má be nju i.

Kabo Yudafoɔm ayo má Yesu yarada ni

³⁷ Yesu yo yoori alekutura sam dɔngu na ba nju i, haari ni nyini mmɔɔ, ba yo má i yarada.

³⁸ Nyini ma Nyɛmɛ nɔaniɛ kanfo Esaya jɔrɛ n bo i yo kɛɛri n yo yiiwa. I nja,
“M Nyɛmɛ Fɛmɛ, nma ade jɔrɛ n bo ya kan i n a?
Ye nma ye a yi u yiko akere i a?”

³⁹ Nyini dɛɛ ti, ye ba koro ayo má Yesu yarada n a. Kabo Esaya akaaki ase ka,

⁴⁰ “Nyɛmɛ ama ba yo anyinsinm
na má bu nju asi,

na wɔ ma bu ahore ayo kekereke

na má bu ti i nɔaniɛ n bu,
adena má bu kaaki ba i dɔ
na bu nya laifiɛ.”

⁴¹ Esaya yo njuuri Yesu jirima woowa n dɛɛ ti, ye i kaanri i nju jɔrɛ n a.

⁴² Yudafo nkpienkpienm dɔngu mmɔɔ yoori Yesu yarada, ama, bu soroori Farasifoɔm n ahore n dɛɛ ti, ba koro ayi má bu nju fofoe nu. Nzen bu yiiri bu nju ka ba yo i yarada, Farasifoɔm ni fón bu fite bu tientienbunɔɔ sɔɔ n nu wɔ.

43 Dama Yudafɔ nkpienkpienm n yo koroori adamande kansi taraari Nyeme deɛ.

Kabo Yesu seeri ka i noanie ni di minem jore ni

44 Na Yesu atien ase ka, “Soɔo kere bo i yo m yarada, ma mini ngumi ye i yo m yarada, ama, i yo bo wo sunma m n gusu yarada a.

45 Na soɔo kere bo i nie na i nuuri m, ti ka wo nu m Si Nyeme bo i sunmaari m n leɛ.

46 Mini bo m ti wein n aba durunya n nu, adena soɔo kere bo i yo m yarada, i wo ma awosin nu.

47 Soɔo kere bo i ti m noanie n na i de ma i, m di ma i mi jore, dama ma ba ma ka m ba di durunya n nufom jore wo, ama, m baari ka m ba de bu tii ji wo.

48 Soɔo kere bo i kete m, na i de ma m noanie ni, i joredifo wo bere wo. Noanie n bo ma joro i ni, yiri di i mi jore jina cɛɛn n a.

49 Dama ma m koroyanu ye m kan so a, ama, m Si n bo wo sunma m ni, yiri maari m noo, kereeri m noanie kun kun kere bo m joro i n a.

50 M si ka i noanie maawa n ti deke bo i ma ngoo bo i la ma awieeri n wo. Nyini deɛ ti, kabo m Si seeri m ni, so ye m joro a.”

13

Kabo Yesu nmisiiri i susufom n jaa ni

¹ Alecin bo ma bu di Butara cɛɛnkpiri n ni, na Yesu asi nu ka sangana aju bo i fite durunya n nu kaaki ko i Si Nyeme do. Na i deɛ tiengu minem bo bu wo durunya n nu na i koro bu ni, i koro bu so o haari i ko ju i fanga nyaari.

² Na kɔŋɔɛ saŋga bo bu wo diire n di su ni, na Sitana awura Yudasi, Simon Isikariyoti wa n tii nu ka i tɔ Yesu ma i kpɔfɔm.

³ Na Yesu asi nu ka i Si Nyeme afa deke n kere awura i saa nu, na i kaaki si ka i fiteeri Nyeme do baari a, na i kaaki ko i do o.

⁴ Na wo nya yasu ajina, na wo yi i tanlee n ase, na wo fa papawo abo i wi nu.

⁵ Na wo sa nzue ago nyanga nu, na wo bo i bu sunmisi i susufom n jaa, na wo fa papawo n bo i bo i wi nu ni sunuka bu jaam.

⁶ I ba kpuraari Simon Petoro, na wo bisa Yesu ka, “M Mibie, na woro ba nmisi m dee jaa?”

⁷ Na Yesu ase i ka, “Sa bo m suyo i ni, a koro ti ma i bu kisa, ama, fa ko fa ba, a ba ti i bu.”

⁸ Na Petoro ase i ka, “Ai, a nmisi ma m jaa haari durunya n ba yasu.” Na Yesu ase i ka, “Nzen ma nmisi ma u jaa, m ni woro akpaaki lee.”

⁹ Do na Simon Petoro anya ase i ka, “M Mibie, nzen i ti so a, ma a nmisi m jaa ngumi, ama, nmisi m saam ni m tii kere.”

¹⁰ Na Yesu ase i ka, “Sono anya abie nzue, nka i nmisi i jaa a, i bie ma nzue kun, dama i nunie kere ti casi wo. Ambere, am ti casi wo, ama, ma am kere.”

¹¹ Yesu siiri bo i ba to i ma i kpofom ni, nyini ti ye i na ma bu kere ti casi n a.

¹² I nmisi bu jaam wieeri ni, na wo fa i tanlee n awura, na wo ko atana i tanaabiri ni. Na wo bisa bu ka, “Kabo ma yo am ni, am ati i bu?”

¹³ Am fere m ka am Kerefɔ o, na am kaaki fere m ka am Mibie. Am jɔjɔ nahore wo, dama m ti so o.

14 Tɔ. Kisa na mini bo m ti am Mibiε, ni am Kerefo, na ma ηmisi am jaam ni, wɔ yo daka ka ambere gusu ηmisi am bengum jaam sɔ.

15 Dama ma yo akere am lee, na am gusu yo am bengum kabo ma yo am ni.”

16 Na wɔ se bu ka, “Nahore ye m suse am a, akɔ koro tara má i mibiε, na bekun sunmafo gusu koro tara má bo i sunmaari i ni.

17 Nzen am sin ahin n kere, na am yoori sɔ, terefiε wo am dɔ.

18 M sujojo ni má am kere wɔ, dama m si bo ma du mɔ ayi bu ni. Ama, kabo ba kere i Nyeme Jore Kadasi n nu ni, i ti ye ni ka i yo yiiwa, ka, ‘Sɔnɔ n bo m ni yiri sanja di diire taale kun nu, yiri akaaki m jaa tufɔ n a.’

19 M suse am sa bo i bá yo wɔ lee, na i ba yoori, na am yo m yarada ka mini la sɔnhore n bo ma se am kabo m ti n a.

20 Nahore ye m suse am a, sɔnɔ kere bo i de sɔnɔ bo m sunma i ni, i mi ade mini wɔ lee, na sɔnɔ kere bo i de mini, i mi ade yiri bo i sunmaari m wɔ lee.”

Kabo Yesu seeri ka Yudasi tɔ i ma i kpɔfɔm ni

21 Yesu seeri bu sɔ wieeri ni, na i ahore asaaki akɔ asin su, na wɔ se bu kpain ka, “Nahore ye m suse am a, am nu kun bá tɔ m ma m kpɔfɔm a.”

22 Na i susufɔm n abirisi, sunie bu ηnu nu, ama, ba si má bo i yó nyini sa n ni.

23 Bu nu kun be bo Yesu koro i agaya n tana mata Yesu.

24 Na Simon Petoro abo i nyumbaa i dɔ ka i bisa Yesu ka, i ni ηma a?

25 Na yiri n acin adodo Yesu, na wɔ bisa i ka, “Ya Mibiɛ, a ni n̄ma a?”

26 Na Yesu ase i ka, “Sɔnɔ n bo m kp̄iɛ too n bo toro n nu na m fá ma i ni, yiri lɛɛ.” Na wɔ fa too n abo toro n nu, na wɔ fa ama Yudasi, Simon Isikariyoti wa ni.

27 Yesu faari too n maari Yudasi wieeri ni, na Sitana awura i tii nu, na Yesu ase i ka, “Sa n bo a n̄a a yó i ni, kɔ yo i ndende.”

28 Ama, bu kɛɛ bo bu woori diire n di su ni, bu be mmɔɔ asi má deke n bo i ti na Yesu seeri i sɔ ni.

29 Yudasi tiiri bu n̄waa bitafɔ n dɛɛ ti, bu nbem sunsun ka Yesu n̄a i kɔ to deke be na bu fa di cɛɛnkp̄iri n wɔ, wara i kɔ yi n̄waa n be fa ma yaarifɔm wɔ.

30 Yudasi diiri too n wieeri ni, na wɔ yasu afite akɔ. Nyini san̄ga ni, i ti kɔngɛ wɔ.

Kabo Yesu maari bu nɔaniɛ maawa fɔfɔɛ ni

31 Yudasi fite kɔ wieeri ni, na Yesu ase ka, “Kisa ye Nyɛmɛ wúra mini Adamande Wa n kp̄iri a, na m dɛɛ ti ye mine wúra m Si Nyɛmɛ kp̄iri a.

32 Na nzen bu wuraari Nyɛmɛ kp̄iri m dɛɛ ti, Nyɛmɛ gusu wúra m kp̄iri, na Nyɛmɛ má i yo kisa bɛɛɛ.”

33 Na wɔ se bu ka, “M nbaam, m cé má am nu fɛn. Am bá nienie m busu fie wɔ, na kabo m yo seeri Yudafɔm ni, sɔ ye m suse am kisa, ka am koro kɔ má deke bo m sukɔ ni.

34 Nɔaniɛ maawa fɔfɔɛ ye m sufa ma am n a, yiri la ka, am koro am bɛngum. Kabo ma koro am ni, am koro am bɛngu sɔ.

³⁵ Nzen am koro am benḡu, nyini ye sɔnɔ kere si ka am ti m susufɔm a.”

Kabo Yesu seeri ka Petoro kéte kpe nsan ka i si má i ni

³⁶ Na Simon Petoro abisa i ka, “Ya Mibiε, a kó ni wɔ?” Na Yesu abɔ i nu ka, “Deke bo m sukɔ ni, a koro su má m su kisa, ama, sanḡa suba bo a bá su m su.”

³⁷ Na Petoro akaaki abisa i ka, “Ya Mibiε, nzu ti ye m koro su má u su kisa? Nzen i yo yiwee mmɔɔ a, m wú u deε ti.”

³⁸ Na Yesu abisa i ka, “A koro wu m deε ti? Nahɔre ye m suse u a, kana akɔnyuma bá bo, a kéte kpe nsan su ka a si má m.”

14

Kabo Yesu ḡa yiri ti atin n bo sɔnɔ koro fa i sukɔ Nyeme dɔ ni

¹ Na Yesu ase i susufɔm n ka, “Má am ma am ahore saaki. Am yo Nyemeε yarada, na am yo m gusu yarada.

² M Si Nyeme dika n nu, sɔɔm sunnu dɔ, nzen má i ti má sɔ, má m se má am. M kó na m kɔ sɛsɛ woobiri su se am.

³ Na nzen m kɔ sɛsɛ woobiri n su seeri am, m káaki ba fa am kɔ deke bo m kó wo ni, na deke bo m wó ni, am gusu wó dɔ ɔ.

⁴ Na deke bo m sukɔ ni, am si atin ni.”

⁵ Na Tomasi ase i ka, “Ya Mibiε, ya si má deke bo a sukɔ ni, ye ya yo sɛ si atin n a?”

⁶ Na Yesu ase i ka, “Mini ti atin n a, ni nahɔre, ni ḡɔɔ n a. Mini ḡumi ti atin n bo sɔnɔ koro fa i na i kɔ m Si Nyemeε dɔ a.

⁷ Nzen má am siiri m, má am si m Si mmɔɔ, ama, fa nyuma fa kɔ, am asi i, na am aɲu i.”

⁸ Na Filipu ase i ka, “Ya Mibiε, kere ya u Si ni, deke bo ya koro i kere lεε.”

⁹ Na Yesu abisa i ka, “Filipu, bo m ni ambere awo bere ace sɔ n na a si má m? Sɔnɔ kere bo wo ɲu mini aɲu m Si lεε, ye nzu ti ye am ɲa m kere am m Si n a?

¹⁰ A yo má yarada ka m ni m Si n ti deke kun wo, nzen se? Jɔre n bo ma jɔjɔ ama am ni, má m tienɲu jɔjɔwa, ama, m Si bo m ni yiri ti kun ni, yo i juma.

¹¹ Bo m ɲa, m ni m Si n ti deke kun ni, am yo m yarada. Nzen má nyini, am yo m yarada sam bo m yo bu n dεε ti.

¹² Nahore ye m suse am n a. Sɔnɔ kere bo i yo m yarada, yiri mmɔɔ yó ahin sam bo m yo bu ni, na i yó bo bu tara ahin mmɔɔ, dama m sukɔ m Si dɔ ɔ.

¹³ Na deke kere bo am fa m duma fa sereeri i, m yó i ma am, adena mini Baa ni má minem wura m Si kpiri.

¹⁴ Na nzen am ba faari m duma fa sereeri m deke be, m yó i ma am.”

Kabo Yesu jɔjɔ fa kɔɔri Awiewie Casi n su ni

¹⁵ Na Yesu ase bu ka, “Nzen am koro m, am dé m nɔanie maawam ni.

¹⁶ M sére m Si Nyeme, na i má am Bukafɔ fɔfɔre bo i bá wo am dɔ sangga kere.

¹⁷ Yiri la Awiewie Casi n bo i se nahore ni. Durunya n nufɔm koro de má i, dama bu ɲu má i, na bekun bu kaaki si má i, ama, ambere si i, dama i wo am dɔ, na i bá wo am nu.

18 M kɔɔri, m yaki má am na am ka ayikam, m káaki ba am dɔ.

19 Wɔ ka kaan na durunya n nufɔm ɲu má m kun, ama, amɛɛɛ ɲú m. M la ɲɔɔ n dɛɛ ti, am gusu nyá ɲɔɔ.

20 Nyini cɛɛn n ye am sí ka mini ni m Si n ti deke kun a, na mini ni amɛɛɛ gusu ti deke kun wɔ.

21 Sɔɔɔ kɛɛ bo i de m nɔaniɛ maawam, na i su i su, i mi ti bo i koro m a, na bo i koro m ni, m Si gusu koro yiri wɔ, na mini mmɔɔ kóro i mi, na m yí m ɲu kere i.”

22 Na Yudasi, má Yudasi Isikariyoti ni, ase ka, “Ya Mibiɛ, nzu ti ye a yí u ɲu kere yɛɛ a, ye a yí má u ɲu kere má durunya n nufɔm a?”

23 Na Yesu ase i ka, “Sɔɔɔ kɛɛ bo i koro m, i dé m nɔaniɛ ni, na m Si mmɔɔ kóro i mi, na ya bá, na ya bá wo i dɔ.

24 Sɔɔɔ kɛɛ bo i koro má m, i dé má m nɔaniɛ ni. Nɔaniɛ n bo ma jɔjɔ i ni, i ti má m dɛɛ nɔaniɛ, i ti m Si n bo i sunmaari m dɛɛ wɔ.

25 M toko wo am dɔ, ye m suse am ahin kɛɛ a,

26 ama, m Si Nyɛmɛ súnma Bukafɔ ni, m duma n nu, yiri la Awiewie Casi ni, yiri kɛɛ am deke kɛɛ a, na i káaki tɛɲge am su fa kɔ deke kɛɛ bo ma kere am ni.”

27 Na wɔ se bu ka, “Ahoreda n ye m sufa ma am n a. M dɛɛ ahoreda n ye m sufa ma am a. Má kabo durunya n nufɔm ma am ahoreda ye m suma am n a. Má am ma am ahore saaki, má am soro sɛɛɛ.

28 Am ati ka ma se ka, ‘M kó na m káaki ba am dɔ bekun.’ Nzen má am koro m, má am ahore jɔ ka m sukɔ m Si n dɔ, dama m Si tara m.

²⁹ Sa bo wɔ nya yo má lɛɛ, ye ma se am n a, adena i bá yoori, na am yo m yarada.

³⁰ M jójɔ má am dɔ jɔɛ beberebe kun, dama Sitana bo i ti durunya n nufɔm tii ni suba. Ama, i koro yo má m pui.

³¹ M koro ka durunya n nufɔm si ka, m koro m Si ni, nyini dɛɛ ti ye m yo deke kɛɛ bo i se m ka m yo i n a.”

Na wɔ se bu ka, “Am yasu na ya kɔ.”

15

Kabo Yesu ŋa yiri ti baka n ni i tii nahɔɛ su n a

¹ Na Yesu ase bu ka, “Mini ti baka n bo i su suuwa nahɔɛ su a, ye m Si Nyemɛ ti nyini baka n fie niefɔ.

² Asambaa kɛɛ bo i wo m su na i su má, m Si kpiɛ i ji wɔ, na asambaa kɛɛ bo i wo m su na i su, i kpiɛkpiɛ i nyawa n yo i dɔŋgu wɔ, na i su nyunyumi.

³ Jɔɛ n bo m jójɔ maari am ni, yiri adu mɔ ayo am casi a.

⁴ Am wo ni mini na m gusu wo ni amɛɛ. Kabo baka asambaa be wo má bɛɛ bo i koro su i ŋgumi, má ka i wo baka n su. Sɔ ye am gusu koro su má, má ka am wo m dɔ.

⁵ Mini ti baka n a, ye amɛɛ ti asambaam ni, sɔŋɔ kɛɛ bo i wo m dɔ, na mini mmɔɔ wo i dɔ, i mi su suuwa nyunyumi wɔ, dama am koro yo má pui, má ka am awo m dɔ.

⁶ Sɔŋɔ kɛɛ bo i wo má m dɔ, bu kpiɛ i ji wɔ, kabo bu kpiɛ baka asambaa na i wu n wɔ, na bu tien bu nɔɔ wura sin nu na bu je ni.

⁷ Nzen am wo m do, na m noanie n wo am ahore su, deke kere bo am koroori i, na am sereeri Nyeme, am nya i.

⁸ Nzen am su suuwa nyunyumi, nyini kere ka am ti m susufom a, na i wura m Si kpiri.

⁹ Kabo m Si koro m ni, so ye mini mmoo koro am a, am wo ni m koro ni.

¹⁰ Ma de m Si noanie maawam n dee ti ye i koro m a. Nzen am gusu de m noanie maawam ni, m gusu koro am so o.

¹¹ Ma se am ahin sam na am ahore jo kabo m ahore ajo n wo, na am ahore jo n ko sin su.

¹² M noanie maawa n la ka o, am koro am bengu kabo m koro am ni.

¹³ Koro be wo ma ahin koro n sin, ka sono wu i danfom ti.

¹⁴ Nzen am su m noanie maawa n su, am ti m danfom wo lee.

¹⁵ M fere am m danfom wo, m fere ma am ka m akoom kun, dama sono akoo si ma i mibie sayoowa kere, ama, deke kere bo ma ti i m Si do ni, ma fa akere am.

¹⁶ Ma amberere yiiri m a, ama, mini ayi am ase ka am ko su suuwa bo i wo bere sangha kere, na deke kere bo am ba fa m duma n sereeri m Si, i yo i ma am.

¹⁷ Noanie maawam n bo m sufa ma am la ka, am koro am bengum.”

Kabo Yesu na durunya n nufom kpo i susufom ni

¹⁸ Na Yesu asa su ase bu ka, “Nzen durunya n nufom kpo am, am si nu ka o, ba du mo akpo mini wo, ye bu nya ba sukpo am n a.

¹⁹ Nzen má am ti durunya n nufóm dεε minem, má bu koro am kabo bu koro bu beɲgu n wɔ. Ama, bo ma yi am afite durunya n nufóm nu, na am ti má durunya n nufóm dεε minem n ti, ye bu kpɔ am n a.

²⁰ Má am ma am wara fi ka ma se am ka, akɔɔ tara má i mibiε. Nzen bu yo kereeri m wuwuruwa, sɔ ye bu kére am gusu wuwuruwa a. Na nzen bu yo deerɪ m nɔaniε, bu dé am gusu dεε ni.

²¹ Bu yó am nyini n kére, m dεε ti, dama bu si má m Si bo i sunmaari m ni.

²² Nzen má ma ba akan má m ηu jɔre akere má bu, má bu si má ka ba yo satie, ama, kisa na ma kan akere bu ni, bu koro kan fite má nu ka ba yo má satie.

²³ Sɔnɔ kére bo i kpɔ m, i kpɔ mini ni m Si n kére wɔ lεε.

²⁴ Ma yo alekutura sam bo ba ηu i. Be wo má bere bo i koro yo nyini alekutura sam sɔ. Nzen má ma yo má nyini alekutura sam na ba ηu má i, má be fa má bu ηgasi ka bu ti satieyofóm. Ama, kisa, ba ηu nyini n kére, na bu toko kpɔ m ni m Si ni.

²⁵ Nyini ma kabo ba kére i Nyeme Jɔre Kadasi n nu n ayo yiiwa n a, ka, 'Bu kpɔ m kpɔ ηgbεen wɔ.'

²⁶ Na Bukafɔ n bo m súnma i fite m Si dɔ na i bá am dɔ ni, yiri ti Awiewie Casi n bo i kere kabo Nyeme ti nahɔre su n a, yiri dí m ηusu daani kere am a.

²⁷ Na am gusu di m daani, dama m ni ambere wo bere a, fite m juma n bumboori ba ju ni kisa.

16

¹ M suse am ahin sam kere bo bu bá yo n wɔ, na bu ba yoori, na má am kaaki am sin bo m.

² Bu bá fɔn yi am fite bu tientienbunɔɔ sɔɔm n nu, ama, san̄ga suba bo bu bá kun am, na bu súnsun ka bu susu Nyeme wɔ.

³ Bu si má m ni m Si n dɛɛ ti, ye bu yó nyini sam kere n a.

⁴ Ma se am sam bo bu bá yo lɛɛ, na i san̄ga ba juuri, na am tɛn̄ge su ka m yo seeri am.”

Kabo Awiewie Casi n juma ti barasu ni

Na Yesu asa su ase bu ka, “M ni ambere yo woori bumboori n dɛɛ ti, ye ma yo ase má am ahin kere a.

⁵ Ama, kisa m sukaaki kɔ yiri bo i sunmaari m n dɔ ɔ, ye am be akoro abisa má m ka, ‘Ye a sukɔ ni wɔ?’

⁶ Bo ma se ka m kó yaki am dɛɛ ti, am ahore asaaki agaya.

⁷ Ama, nahore ye m suse am n a, i ti am buka su wɔ ka m kɔ, dama nzen má m kɔ má, má Bukafɔ ni bá má, ama, nzen m kɔɔri, m súnma i am dɔ.

⁸ I baari, i kere durunya n nufɔm deke bo i ti satie, na i kere bu deke bo i ti sakpa na i kɔ atin su Nyeme dɔ, na i káaki kere bu kabo Nyeme bá di sɔnɔ kere jɔre barasu.

⁹ I kere bu deke bo i ti satie, dama bu yo má m yarada.

¹⁰ Na i kere bu deke bo i ti kpa na i kɔ atin su Nyeme dɔ, dama m sukɔ m Si n dɔ ɔ, na am n̄jú má m kun.

11 Na i káaki kere bu kabo Nyeme bá di sono kere jore, dama Nyeme adi Sitana bo i ti durunya n nufom kere tii n jore ayo i ngbeen.

12 M toko la jore danggu bo má m se am, ama, am koro de má i kere kisa.

13 Ama, Awiewie Casi n bo i se nahore n ba baari, yiri kere am nahore atin kere a, dama jore kere bo i kán kere am ni, má i dee yiko nu ye i fá kan, ama, kabo Nyeme kere i ni, so ye i kán, na i kere am sam bo bu bá yo ni.

14 Yiri wúra m kpiri a, dama i kán m nu jore kere am.

15 Deke kere bo i ti m Si dee, i ti m dee wo, nyini dee ti ye ma se am ka, i kán m nu jore kere am n a.”

Kabo Yesu kaanri ahoresaaki ni ahorejo jore ni

16 Na Yesu ase bu ka, “Wo ka kaan na am nu má m, ama, i ba yoori kaan buka su na am nu m bekun.”

17 Na i susufom n nbem abisa bu nu nu ka, “Nzu jore ye i jorori i so n a? I na, wo ka kaan na ya nu má i, ama, i ba yoori kaan buka su, ya nu i bekun. Ye wo kaaki ase bekun ka, i suko i Si do o.”

18 Na ba kaaki abisa bu nu nu ka, “Ye ahin dee, i ba yoori kaan n bu la ka se wo lee? Ya si má i jorowa n bu.”

19 Na Yesu afa nu ka bu koro ka bu bisa i nyini jorowa n bu wo. Na wo bisa bu ka, “Bo m seeri ka wo ka kaan na am nu má m, ama, i ba yoori kaan buka su, am nu m bekun n ye am subisa am nu nu, na am si i bu, nzen se?”

²⁰ Nahore ye m suse am a, ambere bá sun na am kóko, ama, na durunya n nufom bere ahore jó. Ambere ahore bá saaki, ama, am ahoresaaki ni bá kaaki ahorejo.

²¹ Nzen bara anya akutu ka i wu baa, i la ahoresaaki, dama i wahara san̄ga ye wɔ ju a, ama, i ba wuuri baa n wieeri, i tɛnge má i wahara n bo wɔ sin n su kun, dama baa n bo wɔ wu i durunya n nu n ti, i ahore ajo.

²² I ti sɔ ɔ, am gusu dɔ, kisa, am la ahoresaaki, ama, m bá ŋu am bekun, na am ahore jó bo sɔnɔ koro dé má am ahorejo n am dɔ.

²³ Nyini cɛen ni, am b́isa má deke be busu m dɔ. Nahore ye m suse am a, deke kere bo am sereeri m Si ni, m duma n nu, i yó i ma am.

²⁴ Am nya sere má m Si deke be m duma n nu haari ni nyuma. Kisa am sere i, na am nyá i, na am ahore jó kɔ sin su.”

Kabo Yesu akunma durunya n ni

²⁵ Na Yesu ase bu ka, “Ma se am ahin n kere anyunderɛ nu wɔ lɛɛ, san̄ga suba bo m bó má am anyunderɛ kun, ama, m kán m Si ŋu jɔre kere kpain kere am a.

²⁶ Nyini cɛen ni, am fá m duma n fa sere Nyemɛ, má mini sere Nyemɛ ma am a.

²⁷ Yiri m Si ni i tii koro am a, dama am koro m na am ayo yarada ka m fite i dɔ ɔ.

²⁸ M fiteeri m Si dɔ ɔ baari durunya n nu a, ye kisa m sufite durunya n nu kaaki kɔ i dɔ a.”

²⁹ Na Yesu susufom n ase i ka, “Kisa a jɔjɔ ya dɔ weinwein wɔ, a bo má ya anyunderɛ kun.

³⁰ Ama, kisa ya si ka a si deke kerε, wɔ ti má ye ni ka be bisa u deke be, dama kana bu ba bisa u deke be, a si kabo bu koro ka bu bisa u ni, nyini ma ya si ka a fite Nyeme dɔ n a.”

³¹ Na wɔ bisa bu ka, “Am ayo yarada kisa?”

³² Ama, sanɔa suba bo wɔ ju awie, bo am kerε bá sandi yaki mini ngumi, na sɔnɔ kerε kó i dika, ama, m wo má m ngumi, dama m Si Nyeme wo m dɔ.

³³ Ma se am ahin kerε na am la ahoreda m dɔ. Am nɔ́ kekereke durunya n nu, ama, am fa ahoresi, dama ma kunma durunya ni.”

17

Kabo Yesu sereeri Nyeme maari i susufɔm n ni

¹ Yesu seeri sɔ wieeri ni, na wɔ ye i tii su anie angoro na wɔ sere Nyeme. I ɔa, “M Si, sanɔa n aju. Wura mini u Wa n kpiri, adena m gusu wura u kpiri.

² Dama a ma m yiko ka m nie minem kerε su, na bo a fa bu ama m ni, m má bu ngɔɔ bo i la má awieeri.

³ Wɔrɔ ngumi ti Nyeme nahɔre su a. Na mine bo bu si u, na bu si mini Yesu Kristo n bo a sunmaari m ni, bere la ngɔɔ bo i la má awieeri n a.

⁴ Ma wura u kpiri durunya n nu, dama ma yo juma n bo a ma m ka m yo i n awie.

⁵ M Si, sanɔa bo durunya nya bo má i bu ni, m yo woori u dɔ ɔ, ye a wura m kpiri a. Kisa, kaaki wura m kpiri u dɔ bekun.

⁶ Minem n bo a yiiri bu fiteeri durunya n nu fen, ma kere bu kabo a ti barasu. Bu tiiri u

dɛɛm wɔ, ye a faari bu maari m a, ye ba de u nɔaniɛ n a.

⁷ Kisa bu si ka deke kɛrɛ bo a fa ama m ni, fite u dɔ ɔ.

⁸ Dama nɔaniɛ n kɛrɛ bo a jɔjɔ fa maari m ni, m gusu ajɔjɔ ama bu, ye ba de i, ye ba si ka i ti nahɔrɛ ka m fiteeri u dɔ ɔ, ye ba yo yarada ka wɔrɔ sunmaari m a.

⁹ M susere u ma bɛrɛ wɔ, má bo bu wo durunya n nu ni, ama, minɛm bo a fa bu ama m ni, bɛrɛ ye m sere u ma bu a, dama bu ti u dɛɛ minɛm wɔ.

¹⁰ M minɛm kɛrɛ ti u dɛɛm wɔ, ye u dɛɛm gusu kɛrɛ ti m dɛɛm, ye ba ma minɛm aɲu m jirima woowa ni.

¹¹ Kisa, m suba u dɔ lɛɛ, m ká má durunya n nu fɛn kun, ama, bɛrɛ ká fɛn wɔ. M Si, wɔrɔ bo a ti casi ni, yo bu kanda u duma n bo a fa maari m n yiko nu, na bu yo deke kun, kabo mini ni wɔrɔ ti kun ni.

¹² Sanga bo m woori bu dɔ ni, m yoori bu kanda u duma n bo afa ama m yiko nu wɔ. M niɛri bu su, na bu be aka má ɲgbɛɛn, má ka bo wɔ ka ɲgbɛɛn haari i ni kunnu ni, adena kabo ba kɛrɛ i Nyɛmɛ Jɔrɛ Kadasi n nu n yo yiiwa.

¹³ Kisa m suba u dɔ lɛɛ, ama, m toko wo durunya n nu ye m jɔjɔ ahin jɔjɔɔwa n na bu nya m dɛɛ ahɔrɛjɔ n kɔ sin su.

¹⁴ Ma fa u nɔaniɛ n afa ama bu, na kabo m ti má durunya n nu fɛn fɔ be ni, sɔ ye bu gusu ti má durunya n nu fɛn fɔm a, nyini dɛɛ ti, durunya n nufɔm koro má bu jɔrɛ.

¹⁵ M susere má u ka a yi bu fite durunya n nu wɔ, ama, m susere u ka a kanda Sitana satie-yofɔ ni, na i yaki bu.

16 Kabo m ti má durunya n nu fen fɔ ni, sɔ ye bu gusu ti má durunya n nu fen fɔm a.

17 U nɔaniɛ n ti nahɔrɛ wɔ. Ma u nɔaniɛ n bo i ti nahɔrɛ n yo bu casi.

18 Kabo a sunmaari m durunya n nu ni, sɔ ye m gusu asunma bu a.

19 Bɛrɛ dɛɛ ti, ye ma fa m ɲu ama u a, adena bɛrɛ gusu fa bu ɲu ma u nahɔrɛ n dɛɛ ti.

20 M susere má u ma má bɛrɛ ɲgumi wɔ, ama, m susere u ma minɛm bo bu bá yo m yarada ahinm dɛɛ nɔaniɛ kaanwa n ti wɔ.

21 M Si, m sere u ka a ma bu kɛrɛ yo kun, kabo a wo m dɔ, na m gusu wo u dɔ ni, ma bɛrɛ gusu wo ya dɔ, adena durunya n nufɔm yo yarada ka wɔrɔ sunmaari m a.

22 U jirima woowa n bo a maari m ni, ma fa ama bu, na bu yó kun kabo m ni wɔrɔ ti kun ni.

23 M wo bu dɔ, na u gusu wo m dɔ, nyini ma bu yo deke kun kabo a koro ka bu ti n a, na durunya n nufɔm si ka wɔrɔ sunmaari m a, na kabo a koro m ni, a koro u minɛm gusu sɔ ɔ.

24 M Si, m koro ka a ma minɛm bo a fa bu ama m n bá wo m dɔ, deke bo m wo ni, na bu ɲú m jirima woowa n bo a fa maari m ni, dama sanja bo a nya ayi má durunya n ye a koro m a.

25 M Si, wɔrɔ yo sa kɛrɛ bo i kɔ atin su n a, durunya n nufɔm si má u, ama, mini si u, na ahinm gusu si ka wɔrɔ sunmaari m a.

26 Ma kere bu kabo a ti barasu, na m toko sukere bu wɔ, adena koro n bo a koro m n wó bu nu, na m ni bɛrɛ yó kun.”

Kabo bu kɔɔri ka bu kɔ tara Yesu ni

1 Yesu sereeri Nyeme wieeri ni, na i ni i susufom n ayasu ako akpie Kedoron nzuetin n buekun do, deke bo baka fie be wo ni, na ba ko awura baka fie n nu.

2 Yudasi bo i suto Yesu ma i kprofom ni si dika n nu, dama Yesu ni i susufom nati tien bu noo do o sangga sangga.

3 Na Yudasi aba do. Sojam su i su, ni tintini-jinafom bo Nyeme sayoowa donguyofom nkpienkpienm n ni Farasifom asunma bu n buka su. Bu bita fitanam, ni wura sinm, ni biesoya nenjem.

4 Yesu si sa kere bo i ba tu i ni, na wo kpa bu atin abisa bu ka, "Am koro nma a?"

5 Na ba bo i nu ase i ka, "Ya koro Yesu Nazaretifo n wo." Na wo se bu ka, "Yiri la mini." Yudasi bo i toori i ni jina sojam n nu.

6 Yesu seeri ka, "Yiri la mini" ni, na bu kere akoko bu sin akpakpaasi asienngu.

7 Na wo kaaki abisa bu bekun ka, "Am koro nma a?" Na ba se i ka, "Ya koro Yesu Nazaretifo n wo."

8 Na wo se bu ka, "Ma se am ka yiri la mini. Nzen am koro mini wo, am ma ahin minem bere ko."

9 I seeri so ni, na i noanie bo i yo jooori i n ayo yiiwa, ka, "Minem bo a fa bu ama m ni, m ma ma bu be ka ma ngbeen."

10 Nyini sangga Simon Peto jina bita takobe, na wo cin aworo i akpie sono be sui, i saa fomboro dee ni, nyini sono n ti Nyeme sayoowa donguyofom kpien n akoo. Bu fere i ka Malikusi.

¹¹ Na Yesu ase Petoro ka, “Fa u takobe n wura i buε nu. A ŋa má m ŋu anyumboro n bo m Si afa ama m n wɔ?”

Kabo bu taraari Yesu kɔɔri bu kpien Anasi dɔ ni

¹² Na sojam, ni bu kpien, ni Yudafɔm nkpien-kpienm n tintinijinafɔm n atara Yesu acici i nyama.

¹³ Bu du mɔ faari i kɔɔri sɔnɔ be bo bu fere i ka Anasi n dɔ ɔ ka. Anasi sibiε la Kayafasi. Kayafasi ti Nyemε sayoowa dɔŋguyɔfɔm kpien n nyini afɔ n a.

¹⁴ Yiri Kayafasi ti bo i yo seeri Yudafɔm ka i ti ye ni ka sɔnɔ kun wu ma minem kerε n a.

Kabo Petoro keteeri ka i si má Yesu ni

¹⁵ Bu taraari Yesu sukɔ ni, na Simon Petoro ni Yesu susufɔ n kun asu i su akɔ. Nyemε sayoowa dɔŋguyɔfɔm kpien n si nyini Yesu susufɔ n dεε ti, ye i suuri Yesu su wuraari yiri Nyemε sayoowa dɔŋguyɔfɔm kpien n gisan nu a.

¹⁶ Ama, na Petoro yiri aka ajina dasin anɔ n nu, na yiri susufɔ n bo Nyemε sayoowa dɔŋguyɔfɔm kpien n si i ni afite, na wɔ ba afani n bo i jina kanda anɔ n dɔ, na wɔ sere i atin na wɔ fa Petoro awura.

¹⁷ Na afani n bo i jina kanda anɔ n abisa Petoro ka, “Wɔrɔ mmɔɔ ti nyini sɔnɔ n susufɔm nu kun wɔ, má sɔ?” Na Petoro ase i ka, “Ai, m ti má bu kun.”

¹⁸ Ayεε sanga lεε, na Nyemε sayoowa dɔŋguyɔfɔm kpien ni ngbefenem, ni tintinijinafɔm atorɔ sin wo tun su, na Petoro gusu ajina bu bi sutun sin n be.

Kabo Nyeme sayoowa dɔɔguyofɔm n kpien n diiri Yesu jɔre ni

¹⁹ Na Nyeme sayoowa dɔɔguyofɔm n kpien n abisa Yesu fa kɔ i susufɔm n jɔre, ni kabo i kereewa n ti barasu ni.

²⁰ Na Yesu ase i ka, “Sanɔa kere m jɔjɔ sɔɔɔ kere nyunu wɔ, na m kere bu Nyeme nɔaniɛ ni bu tientienbunɔɔ sɔɔm n nu, ni Nyeme Sereebiri Awuru n nu, deke bo Yudaɔm kere tien bu nɔɔ ni, m kan má jɔre be fiɛwa nu.

²¹ Ye nzu ti ye a bisa m a? Bisa minem bo bu tiiri m kereewa n ka m seeri bu se wɔ. Bere si kabo m seeri bu n a.”

²² Yesu seeri sɔ ni, na tintinijinaɔ n bo i jina dodo i n abo i nyɔɔnu, na wɔ bisa Yesu ka, “Sɔ ye a bɔ Nyeme sayoowa dɔɔguyofɔm kpien n nu a?”

²³ Na Yesu ase i ka, “Nzen ma jɔjɔ jɔre bo wɔ kɔ má atin su, kan na m ti. Ye nzen bo ma se n ti nahɔre, nzu ti ye a bo m nyɔɔnu a?”

²⁴ Na Anasi ama ba fa i ni nyama ciciiwa n sɔ akɔ Kayafasi bo i ti Nyeme sayoowa dɔɔguyofɔm n kpien n dɔ.

Kabo Petoro keteeri bekun ka i si má Yesu ni

²⁵ Simon Petoro jina woori sin n tun su ni, na ba bisa i ka, “Wɔrɔ mmɔɔ ti i susufɔm kun wɔ, má sɔ?” Na Petoro akete, i ŋa, “Ai, m ti má bu kun.”

²⁶ Na Nyeme sayoowa dɔɔguyofɔm kpien n akɔɔ be, i dikafɔ la sɔɔɔ n bo Petoro kpie yiiri i sui ni, na wɔ se Petoro ka, “Ma ŋu má u ka a wo i bi baka fie n nu dɔ?”

27 Na Petoro akete bekun, kpennga akonyuma abo.

Kabo bu faari Yesu baari Gomina Pilato do ni

28 Na alecin ngarama fun na ba fa Yesu afite Kayafasi dika n nu, na ba fa i ako gomina n dika, bu fere gomina n ka Pilato. Yudafom awura ma gisan nu, adena ma bu yo bu nu fin, na bu koro di ma Butara cenkpiri ni.

29 Nyini ti, na Pilato afite aba bu do dasin abisa bu ka, "Ahin sono n bo am afa i aba m do ni, i ngasi la bono?"

30 Na ba se i ka, "Nzen ma wo do ma ngasi be, ma ya fa ma i ba ma u do."

31 Na Pilato ase bu ka, "Amberε mmoo ni am tii fa i ko di i jore kabo am joredi atin kere ni." Na Yudafom n ase i ka, "Ya la ma atin bo ya kun sono."

32 Bu seeri so ni, adena Yesu nonie n bo i seeri kabo i ba wu barasu n yo yiiwa.

33 Na Pilato akaaki awura gisan n nu, na wo fere Yesu abisa i ka, "Woro ti Yudafom Feme n a?"

34 Na Yesu abisa i ka, "U dee sunsunni nu lee, nzen be seeri u a?"

35 Na Pilato abisa i ka, "M ti Yudafom? U minem ni Nyeme sayoowa donguyofom nkpien-kpienm ni faari u baari m do a. A do nzu ngasi wo?"

36 Na Yesu ase i ka, "M femeya n ti ma durunya n nu fen femeya. Nzen ma m femeya n ti durunya n nu fen femeya, ma m susufom ba kun lue m busu, na ma be koro tara ma m wura

má Yudafòm saa nu. Ama, m femeya n ti má durunya n nu fen dɛɛ.”

³⁷ Na Pilato abisa i bekun ka, “Nka a ti femɛ wɔ lɛɛ?” Na Yesu ase i ka, “Bo a ŋa m ti femɛ ni, i ti sɔ ɔ. Bu wuuri m durunya n nu ka m ba di nahɔɛ n daani wɔ. Na sɔnɔ kɛɛ bo i su nahɔɛ n su, i de m nɔaniɛ n wɔ.”

³⁸ Na Pilato abisa i ka, “Nahɔɛ la nzu wɔ?”

Kabo bu maari nɔɔ ka bu kun Yesu ni

Pilato seeri i sɔ, na wɔ kaaki afite akɔ Yudafòm dɔ akɔ ase bu ka, “Ma ŋu má i ŋgasi be wɔ do i.

³⁹ Ama, am la am yoowa be bo i ma m atin ka m yi dansaraka kun ma am Butara cɛɛnkpiri n di sanɔa. Am koro ka m yi ambere Yudafòm Femɛ ni ji ma am a, nzen sɛ?”

⁴⁰ Na ba tien ase ka, “Má yiri. Ya koro Barabasi wɔ.” Barabasi ti sɔnɔ bo i nati fin minem di wɔ.

19

¹ Na Pilato ama ba fa Yesu akɔ afin i ŋgbere.

² Na sojam n awura i tanlɛ kɔkɔɛ yorom ka femeya dɛɛ su, na ba fa buwe aɲɔ i ka kaba dɛɛ su, na ba fa aforo i tii.

³ Na bu suba i dɔ suyo i anzasi se i ka, “Yudafòm Femɛ, ya yo u anɛ.” Na ba bo i nyɔɔnu.

⁴ Na Pilato akaaki afite aba Yudafòm dɔ aba ase bu ka, “Am ti fen, m sufa i fite ba kere am wɔ, na am si ka ma ŋu má ŋgasi bo wɔ do i.”

⁵ Yesu tie fiteeri ni tanlɛ kɔkɔɛ yorom ni, ni i tii buwe kaba n ni, na Pilato ase bu ka, “Am niɛ, sɔnɔ n yaa.”

⁶ Deke bo i tie fiteeri na Nyeme sayoo-wa donguyofom nkpienkpienm ni tintinijinafom nuuri i so ni, kpennga na ba tien, bu na, “Am kpama i baka jaanu n su na i wu. Am kpama i.” Na Pilato ase bu ka, “Amberε mmoo ni am tii fa i ko kpama i e. Mini, ma nu ma ngasi bo wo do i.”

⁷ Na ba se i ka, “Ya la noanie kpamaawa be, wo yo daka ka i wu, dama i na i ti Nyeme Wa a.”

⁸ Pilato tiiri ka Yesu na i ti Nyeme wa ni, na sere ati i abuka su.

⁹ Na wo kaaki awura gisan n nu abisa Yesu ka, “A fite ni wo?” Ama, Yesu abo ma i nu.

¹⁰ Na Pilato akaaki abisa i ka, “A bo ma m nu? A si ma ka m la yiko bo m koro ma bu fa u ji, na m kaaki la yiko bo m koro ma bu kpama u baka jaanu n su?”

¹¹ Na Yesu ase i ka, “Nzen ma Nyeme ama ma u atin, maala ma yiko bo a koro yo m pui. Nyini ti, sono n bo i faari m wuraari u saa nu ni, i satie yoowa tara u deε.”

¹² I seeri so ni, na Pilato akpi kabo i yo na i yaki Yesu nu ji. Ama, na Yudafo m sutientien suse ka, “Nzen a yakiiri i nu jiiri, u ni Feme Siza danfoya awie lee, dama sono kere bo i yo i nu ka i ti feme, i mi ti Feme Siza kpofa o.”

¹³ Pilato tiiri so ni, na wo fa Yesu afite, na wo tana jore diibiri n su bimbini n su. Yudafo m anie nu bu fere i ka *Gabata*, i bu la ka, deke bo ba fa yabue asese su ayo i dongu ni.

¹⁴ Nyini een n tiiri bu Butara eenkpiri n kpokpo een wo, wiesu kerefi buru ni nnyo sanga a. Na Pilato ase Yudafo m ka, “Am feme n yaa.”

¹⁵ Na ba kaaki atien ase ka, “Am fa i kɔ, am fa i kɔ kpama i baka jaanu n su.” Na Pilato abisa bu ka, “M fá am fεmε n kɔ kpama i baka jaanu n su?” Na Nyεmε sayoowa dɔnguyofɔm nkpienkpienm n ase ka, “Ya la má fεmε be sin Fεmε Siza ηu.”

¹⁶ Bu seeri sɔ wieeri ni, na Pilato anya afa i ama bu ka bu kɔ kpama i baka jaanu n su.

Kabo bu kpamaari Yesu baka jaanu n su ni

Na ba de Yesu ako.

¹⁷ Na yiri ni i tii asɔ i baka jaanu n ako awɔrε n bo bu fere i ka Tereawa Woobiri ni, Yudafɔm anie nu bu fere dɔ ka *Gologota*.

¹⁸ Na ba kpama i baka jaanu n su dɔ, na ba kaaki akpama mine nnyɔ nbem adodo i, bu kpamaari kun i saa fɔmbɔrɔ su, na ba kpama kun i saa bie su, na Yesu awo bu afien.

¹⁹ Na Pilato akere kerεewa be amata i tii su baka jaanu n su. Kerεewa n la ka, “Yesu Nazaretifo n bo i ti Yudafɔm Fεmε n lεε.”

²⁰ Bu kerεeri nyini kerεewa n Yudafɔm, ni Romafɔm, ni Girikifɔm dεε aniem kere nu wɔ, na Yudafɔm dɔngu aɲu i, na ba kan i, dama deke bo bu kpamaari i n waari má ni mie kunnu.

²¹ Na Nyεmε sayoowa dɔnguyofɔm nkpienkpienm n akete ase Pilato ka, “Má a kere ka, ‘Yudafɔm Fεmε n lεε,’ ama, kere ka, ‘Ahin sɔnɔ ηa, ‘Mini ti Yudafɔm Fεmε n a.’ ’ ”

²² Na Pilato ase bu ka, “Bo ma kere i ni, nyini lεε wɔ.”

²³ Sojam n kpamaari i baka jaanu n su wieeri ni, na ba kpaaki i nenje wuraawam nu busu nna, na bu kere afa kun kun, na wɔ ka i tanlεε

yorom bo i wo i bu na i wura be gɔ su ni, i la má gise kpaabiri, ama, ba wu i kere angoro kɔ jura asienngu wɔ.

²⁴ Na ba se ka, “Má am ma ya sonsɔn i nu, ama, am ma ya tu mbaa na ya si bo i dí i.” Bu yoori sɔ adena Nyeme Jɔre Kadasi n yo yiiwa, bo ba kere i ka,

“Ba kpaaki m nenge wuraawam nu,
na ba tu mbaa m tanleɛ n bo i wo m bu n
busu ni.”

Nyini ti ye sojam yoori sɔ n a.

²⁵ Na Yesu ni, ni Yesu ni niemabara, ni Kolopasi yi Mariya, fa kɔ tuuri Mariya n bo i fite Magadala n jina dodo deke bo bu kpamaari Yesu ni.

²⁶ Yesu nie ŋuuri i ni ni, ni i susufɔ n bo i koro i agaya n ka bu jina dodo i ni, na wɔ se i ni n ka, “M ni, nie fen, u wa la ahin.”

²⁷ Na wɔ se i susufɔ n gusu ka, “Nie fen, u gusu ni leɛ.” Nyini cɛen n kere na Yesu susufɔ n afa Yesu ni, na wɔ kɔ awo i dɔ.

Kabo Yesu wuuri ni

²⁸ Nyini sin na Yesu asi nu ka wɔ yo i juma kere awie, na wɔ se ka, “Nzuehɔɛ ti m wɔ.” I seeri sɔ ni, adena Nyeme noaniɛ n yo yiiwa.

²⁹ Nyini saŋga dundu be taka bere, wɔ yi ni nzan gagaraki, na ba fa mene afa awɔ baka su afa abo nu alaandi atɔ i nɔɔ.

³⁰ Yesu de nu wieeri ni, na wɔ se ka, “Wɔ wie.” Na wɔ biri i tii, na wɔ yo Nyeme deɛ.

Kabo bu wɔɔri Yesu kpɛ i nvin nu ni

³¹ Nyini cɛen n ti Njumiyi cɛen n kpokpo cɛen n ti, ba koro má ka minem bo ba kpama bu baka jaanu n su n ka sense su bu Njumiyi cɛen ni, dama

Ŋumiyi cɛɛn n bo i suba n ti cɛɛnkpiri bambaka bu dɔɔ. Nyini dɛɛ ti, ye bu sereeri Pilato ka i ma bu kɔ bubu bo ba kpama bu baka jaanu n su jaam n a, na bu yi bu kɔ se bu.

³² Nyini ti, na sojam n akɔ abo abubu sɔnɔ n kun jaam, ni nyinga n gusu dɛɛ, bɛɛ n bo bu kpamaari bu dodoori Yesu ni.

³³ Ama, sanga bo bu ba kpuraari Yesu ni, bu ŋuuri ka yiri awu, nyini dɛɛ ti, ba bubu má i jaam.

³⁴ Ama, na sojam kun afa kpiɛ awɔ Yesu nvin nu, kpenja na nzue ni mbunja susongɔ fite.

³⁵ Sɔnɔ n bo i nyumbaa ŋuuri i ni, yiri di i daani a, adena am yo yarada. I jɔɛ n ti nahɔɛ wɔ, na kabo i di daani n gusu ti nahɔɛ wɔ.

³⁶ Ahin n kɛɛ yoori, adena kabo ba kɛɛ i Nyɛmɛ Jɔɛ Kadasi n nu n yo yiiwa. Ba kɛɛ ka, “I buwe kun n kpein mmɔɔ bu má.”

³⁷ Ye ba kaaki akɛɛ ka, “Minɛm bá niɛ yiri n bo ba wɔ i kpiɛ n wɔ.”

Kabo bu seeri Yesu ni

³⁸ Nyini dɛɛ sin, na sɔnɔ be bo bu fere i ka Yosefu n asere Pilato atin na i yi Yesu ŋunɛ n kɔ se i. Na Pilato ama i atin, na wɔ kɔ ayi i ŋunɛ n baka jaanu n su akɔ. Yiri Yosefu fite miɛ kpiri n bo bu fere i ka Aramatiya n su wɔ, i yo tiiri Yesu susufɔm kun wɔ, ama, i soroori Yudafɔm ahore ti, wɔ yi má i ŋu fofoe nu.

³⁹ Na Nikodemo bo i yo baari Yesu dɔ kɔngue be n gusu aba, i bita ŋuin nvanvani ni tulaalɛɛ sangaawa, i nɔnɔori ju pobu aburana.

⁴⁰ Na ba fa Yesu ηunie ni, na ba yo i kabo Yuda-fom yo bu fuin na bu se i ni, bu faari tulaaleε n gɔɔri i ηu wɔ, na ba nya afa nzee apɔɔndi i.

⁴¹ Deke bo bu kpamaari Yesu ni, baka fie be wo dɔ. Nyini baka fie n nu yabue buε bo ba lokoti i ayo i faŋkunma wo dɔ, bo bu nya se má fuin nu ni.

⁴² Nyini cɛen n ti Nɔumiya cɛen n kpokpo n dɛε ti, na bekun, faŋkunma n waari má ni bere ni, ye bu faari i kɔ seeri nu n a.

20

Kabo Yesu tengeeri i yiwee n nu ni

¹ Yudafoɔm bakue n bumboori, mɔne cɛen ηgarama fuun, nyini sanɔa dika toko ti liim, na Mariya n bo i fite Magadala n akɔ yabue buε faŋkunma n su. I kɔ juuri ni, i ηuuri ka ba yi yabue bambaka n bo bu fa tɔɔri faŋkunma n anɔ ni.

² Na wɔ ηmati akɔ Simon Petoro ni Yesu susufɔ n bo i koro i agaya n dɔ, na wɔ se bu ka, “Ba yi Mibie n faŋkunma n nu, ya si má deke bo ba fa i akɔ ase.”

³ Na Petoro ni i lamɔkɔ n ayasu ka bu kɔ faŋkunma n su.

⁴ Bu mine nnyɔ ni sunmati kɔ a, ama, na kun n anmati asin Petoro ηu adu mɔ aju faŋkunma n su.

⁵ Na wɔ kasi anie faŋkunma n nu, anu ka nzee n da, ama, wɔ wura má faŋkunma n nu.

⁶ Ama, na Simon Petoro yiri aka sin aba aju, na wɔ wura faŋkunma n nu, anu ka nzee n da,

⁷ na wɔ ɲu ka tani n bo bu fa ciinri Yesu tii ka kaba n gusu bubu nu da i ɲgumi.

⁸ Nyini sangá na yiri n bo i du mɔ juuri faɲkunma n su n awura nu, i ɲuuri i ni, na wɔ yo yarada kabo Yesu yo seeri bu ni.

⁹ Ama, ba nya asi má Nyeme Jore Kadasi n bo i ɲa Yesu tɛnge i yiwee n nu n bu.

¹⁰ Na ba kaaki ako awuru.

Kabo Yesu yiiri i ɲu kereeri Mariya n bo i fite Magadala ni

¹¹ Ama, na Mariya aka ajina faɲkunma n su, na i susun. I wo sun su ni, na wɔ kasi anie faɲkunma n nu.

¹² Na wɔ ɲu merɛkem nnyɔ ka bu wura tanlee fofoe tana deke bo bu faari Yesu ɲunie n daari ni, kun tana deke bo bu faari i tii wɔɔri ni, na nyiɲga gusu tana deke bo bu faari i jaa wɔɔri ni.

¹³ Na ba bisa i ka, “Bara, nzu ti ye a sun a?” Na wɔ se bu ka, “Ba yi m Mibie n wɔ, ye m si má deke bo ba fa i ase.”

¹⁴ I seeri so ni, na wɔ kaaki anie i sin. I ɲuuri ka Yesu jina, ama, wɔ si má ka Yesu lee.

¹⁵ Na Yesu abisa i ka, “Bara, nzu ti ye a sun a? A koro ɲma a?” Mariya ɲuuri i so ni, i sunsun ka fie n niefo a. Na wɔ se i ka, “M jakpien, nzen wɔɔ ayi i ako ase deke be a, kere m na m ko fa i.”

¹⁶ Na Yesu afere i ka, “Mariya.” Na wɔ kaaki anie Yesu do, na wɔ se i ka, “*Raboni.*” Yudafo m deɛ anie n nu, i bu la ka, ya Kerefo.

¹⁷ Na Yesu ase i ka, “Má a fa u saa kan m, dama ma nya ako má m Si do, ama, ko na a ko se m

ninbaam n ka, ‘M sukɔ m Si bo i ti am Si ni, ni m Nyemɛ bo i ti amberɛ mmɔɔ Nyemɛ n do.’ ”

¹⁸ Na Mariya n bo i fite Magadala n akɔ ase bu ka, “Ma ɲu Mibiɛ ni.” Na wɔ se bu jɔrɛ n kɛrɛ bo Yesu akan akere i ni.

Kabo Yesu yiiri i ɲu kereeri i susufɔm ni

¹⁹ Na bakue n bumboori, mɔnɛ cɛɛn n naaso sanga, na Yesu susufɔm woori soɔ be nu, na ba tu anɔ n ago bu ɲu, dama bu soroori Yudafo nkpiɛn-kpiɛnm wɔ. Na Yesu aba ajina bu afien ase bu ka, “Am ma am ahore da.”

²⁰ I seeri sɔ wieeri ni, na wɔ fa i saam deke bo bu boori i bulaari ni, ni i nvin deke bo bu wɔɔri i kpiɛ n akere bu. I susufɔm ɲuuri i sɔ ni, na bu ahore ajɔ.

²¹ Na wɔ kaaki ase bu ka, “Am ma am ahore da, kabo m Si sunmaari m ni, sɔ ye mini gusu susunma am a.”

²² I seeri sɔ wieeri ni, na wɔ yi i ɲumi ago bu ɲu, na wɔ se bu ka, “Am de Nyemɛ Awiewiɛ Casi ni.

²³ Sɔnɔ kɛrɛ bo am faari i satie ceeri i, Nyemɛ fá i satie ce i. Ama, sɔnɔ kɛrɛ bo am fa má i satie ce má i, Nyemɛ fá má i satie ce má i.”

Kabo Yesu yiiri i ɲu kereeri Tomasi ni

²⁴ Sanga bo Yesu yiiri i ɲu kereeri i susufɔm buru ni nnyɔm ni, bu nu kun awo má bu nu. Yiri la Tomasi bo bu fere i ka Ndaa ni.

²⁵ I ba baari ni, na ba se i ka, “Ya ɲu Mibiɛ ni.” Na wɔ se bu ka, “Má ka ma ɲu i saa kunma n bo bu kpamaari i ni, na m fa m saa maraka wura nu, na m fa m saa wura i nvin nu deke bo bu wɔɔri i kpiɛ ni, m yó má yarada fieo.”

26 Na i lemocue ceen, na ba wo soo n nu bekun. Nyini ceen ni, Tomasi gusu woori bu nu, na ba yandi atu ano ni. Na Yesu aba ajina bu nu, na wo se bu ka, “Am ma am ahore da.”

27 Na wo se Tomasi ka, “Fa u saa maraka ba wura m saa kunma n nu, na a fa u saa ba wura m nvin kunma n nu. Na a yaki sika na a yo yarada.”

28 Na Tomasi ase i ka, “Woro ti m Mibie, ni m Nyeme a.”

29 Na Yesu ase i ka, “Bo a nu m ti ye a yo yarada? Terefie wo bu do, bo bu nya nu ma m na bu yo yarada ni.”

Deke bo i ti na bu kereeri ahin kadasi n ni

30 Yesu yo yoori alekutura sam beberebe na i susufom n anu i, ama, ba kere ma i kere awura ma ahin kadasi n nu.

31 Ama, ba kere ahinm ni, adena am yo yarada ka Yesu Nyeme Wa ni ti Kristo n a, Tiidefo n bo Nyeme ase ka i sunma i ni, na am yarada ni ma am nya ngoo i dee duma n nu.

21

Kabo Yesu yiiri i nu kereeri i susufom n bekun ni

1 Nyini sin, na Yesu ayi i nu akere i susufom n bekun kunma kpiri n bo bu fere i ka Tiberiya n noo su. Kabo i faari i nu kereeri bu n la ka,

2 i susufo nbem atien bu noo, bere la Simon Petoro, ni Tomasi n bo bu fere i ka Ndaa ni, ni Natanieli n bo i fite Kana bo i wo Galili asien n su ni, ni Zebedi nbaa nnyom ni, ni i susufo nnyo nbem.

³ Na Simon Petoro ase bu ka, “M sukɔ jombaa tara lɛɛ.” Na ba se i ka, “Yɛɛ mmɔɔ sɔ́ u su kɔ ɔ.” Na ba wura lee n nu akɔ, bu woori nzue n nu haari ale kɔ sucin, ba nya koro tara má pui.

⁴ Sangá bo ale ba ciinri wein ni, na Yesu aba ajina kunma n nɔɔ su, ama, i susufɔm n asi má ka yiri lɛɛ.

⁵ Na wɔ bisa bu ka, “M nbaam, am anya má jombaa, má sɔ?” Na ba se i ka, “Ai, ya nya má be.”

⁶ Na wɔ se bu ka, “Am sandi am diendie n lee n fɔmbɔɔ su dɛɛ bue ni, am nyá be.” Bu sandiiri ni, na ba tara jombaa beberebe, haari ba koro ama má diendie n su.

⁷ Na Yesu susufɔ n bo i koro i agaya n ase Petoro ka, “Ya Mibiɛ lɛɛ.” Deke bo Petoro tiiri ka, bu Mibiɛ lɛɛ ni, nyini sangá i jina i ŋuniɛ ŋgbɛɛn wɔ. Na wɔ yo ndende afa i tanlɛɛ abo i wi nu, na wɔ ti ato nzue n nu.

⁸ Ama, na i beŋgu susufɔm n bo bu wo lee n nu ni, sucin diendie n bo wɔ yi ni jombaa ni, na bu fa ba kunma n nɔɔ su ni. Deke bo bu wo n ni kunma n nɔɔ su n waari má, i tiiri ajaari natiwa yaa kun wɔ.

⁹ Bu cin kɔ juuri kunma n nɔɔ su ni, na bu fiteeri lee n nu ni, bu ŋuuri ka sinmɔne da, jombaa nana su, kpɔnɔ da bɛɛɛ.

¹⁰ Na Yesu ase bu ka, “Am fa jombaa n bo am atara bu kisa n be bra.”

¹¹ Na Simon Petoro awura lee n nu, na wɔ cin diendie n bo wɔ yi ni jombaa ŋgbingbiri n aba aheme. Jombaa n kɛɛ kɔ yasuuri yaa ni aburunu ni nsan a, ama, haari ni nyini jombaa beberebe n kɛɛ, diendie n ati má.

¹² Na Yesu ase i susufom n ka, “Am ba yo daraka.” Bu be abo má su, na i bisa i ka, “Worɔ ɲma?” dama bu kere si ka bu Mibiɛ n a.

¹³ Na Yesu aba afa kponɔ n ama bu, na wɔ fa jombaa n gusu abuka bu su.

¹⁴ Ahin yoori kpe nsan su, bo i yiiri i ɲu kereeri i susufom n a, sangá bo i tengeeri i yiwee n nu ni.

Kabo Yesu ni Petoro boori anzama ni

¹⁵ Bu yoori daraka n wieeri ni, na Yesu abisa Simon Petoro ka, “Yohane wa Simon, a koro m tara kabo nyingam ni koro m ni?” Na wɔ se i ka, “Ɛɛn, m Mibiɛ, worɔ mmɔɔ si ka m koro u.” Na Yesu ase i ka, “Niɛ m nbɔmbaam dika.”

¹⁶ Na wɔ kaaki abisa i kpe nnyɔ su ka, “Yohane wa Simon, a koro m?” Na Petoro ase i ka, “Ɛɛn, m Mibiɛ, worɔ mmɔɔ si ka m koro u.” Na Yesu ase i ka, “Niɛ m nbɔɛm dika.”

¹⁷ Na wɔ kaaki abisa i kpe nsan su ka, “Yohane wa Simon, a koro m?” Na Petoro ahore asaaki kabo wɔ bisa i kpe nsan su kere ka, i koro i ni? Na Petoro ase i ka, “M Mibiɛ, worɔ si deke n kere a, a si ka m koro u.” Na Yesu ase i ka, “Niɛ m nbɔɛm dika.

¹⁸ Nahɔre ye m suse u n a, ka sangá bo a yo ti gbɛfene ni, worɔ mmɔɔ ni u tii bo u wi nu kujara kɔ deke kere bo a koro a, ama, a ba yoori kpien, a yé u saa su angoro wɔ, na be bó u kujara na i fá u kɔ deke bo a koro má ni.”

¹⁹ I seeri sɔ n na i kere kabo Petoro bá wu barasu, na minem ɲú kabo Nyɛmɛ jirima woowa n ti barasu. Nyini sin na wɔ se Petoro ka, “Su m su.”

Yesu ni i susufɔ n bo i koroori i agaya n jɔrɛ

²⁰ Na Petoro akaaki anie anju ka bere susufɔm nu kun bo Yesu koro i agaya n su bu su. Yiri la bo bu yo sudi diire na i tana mataari Yesu na i bisaari i ka, “M Mibiɛ, nma tó u n a?”

²¹ Petoro njuuri ka i su bu su so ni, na wo bisa Yesu ka, “M Mibiɛ, ye ahin n gusu di?”

²² Na Yesu ase i ka, “Nzen m koro ka i wo bere haari sanɔa bo m bá kaaki ba, i nya u se? Wɔrɔ su m su.”

²³ I seeri so n na labari n abara aye i susufɔm dɔ, ka i nyini susufɔ ni wú má. Yesu ase má ka i wú má, ama, i na, “Nzen m koro ka i wo bere haari sanɔa bo m bá kaaki ba, i nya u se?”

²⁴ Nyini Yesu susufɔ ni diiri ahin jɔrɛm kere daani a, yiri kaaki kereeri ahin jɔrɛm kere a, na ya si ka i daani diiwa n ti nahore n a.

²⁵ Yesu yo yoori sam dɔngu, bo má bu na bu kere i kere, ma de má ka bu nyá fofoe durunya n nu, bo bu fá nyini kadasim n kere fa se.

lxxxix

ΝΥΣΜΕ ΙΟΥΕ ΚΑΔΑΣΙ
The New Testament in Anufo (Chokosi)

copyright © 2009 Wycliffe Bible Translators, Inc.

Language: Anufo

Contributor: Wycliffe Bible Translators, Inc.

All rights reserved.

2025-05-01

PDF generated using Haiola and XeLaTeX on 30 Apr 2025 from source
files dated 1 May 2025

fe36d0e6-2a60-5e15-8d1c-8bf275389598